

Inatsisissatut siunnersuut pillugu oqaaseqaatit

Oqaaseqaatit nalinginnaasut

1. Aallaqqaasiut

1.1 Inatsisissatut siunnersuutip tunuliaqutaa

Kalaallit Nunaanni inatsiseqartitsinikkut tunngavigisaaq

Inatsisartut Ombudsmandiat pillugu Inatsisartut inatsisaatigut nr. 7-ikkut, 13. juni 1994-imeersukkut Ombudsmandeqarfik pilersinneqarpoq. Ombudsmandip sulinera pillugu aalajangersakkat Inatsisartut Inatsisartut inatsisaanni § 3-kkut aalajangersarpaat. Inatsisartut Ombudsmandiat pillugu Inatsisartut inatsimmut atatillugu 1993-imi ukiakkut ataatsimiinnermi Inatsisartuni siullermeerinninnermi oqaatigineqarpoq Danmarkimi Ombudsmandi pillugu inatsimmi Kalaallit Nunaanni Ombudsmandi pillugu inatsimmut tunngaviusumi allannguutigitinneqartut Inatsisartunit ingerlaavartumik malinnaavigineqartariaqartut.

Inatsisartut Ombudsmandiat pillugu Inatsisartut inatsisaat nr. 7, 13. juni 1994-imeersoq 1. april 1995-imi atortuulersinneqartoq Inatsisartut Ombudsmandiat pillugu Inatsisartut inatsisaatigut (Ombudsmandi pillugu inatsisikkut) nr. 8-kkut, 3. december 2009-meer-sukkut atorunnaarsinneqarpoq. Misilittakkat arlallit Inatsisartut inatsisaata taamani atuttuup atornerqarnerani aalajangersakkat arlallit piffissap ingerlanerani nalornissutissaqalersitsisarsimanerannik takutitsisut Ombudsmandip sulineri ingerlanerani katersorsimavai. Aalajangersakkat arlallit Ombudsmandi pillugu inatsisikkut erseqqissarneqarput, taamatuttaarlu Ombudsmandip misissuineramik suliaqarnera saqquminngortinneqarluni.

Danmarkimi inatsiseqartitsinikkut tunngavigisaaq

Folketingip Ombudsmandiata sulinera Folketingip Ombudsmandia pillugu inatsisip allanngortinneqarnera pillugu inatsisikkut nr. 502-kkut, 12. juni 2009-meersukkut annertusineqarpoq, pissutsit kiffaangissusiiagaasimasut paaqqinniffinni/suliffeqarfinni il.il. nam-minersortuni pisortani oqartussaasup aalajangiineratigut, pisortani oqartussaasup kaammattuuteqarneratigut pisortaniluunniit oqartussaasup akuersineratigut akuersaerneratigulluunniit kiffaangissusiiagaaffiusuni atugaat pineqartunut aamma ilaalersillugit.

Folketingip Ombudsmandiata sulinera Folketingip Ombudsmandia pillugu inatsisip allanngortinneqarnera pillugu inatsisikkut nr. 568-ikkut, 18. juni 2012-imeersukkut

annertusineqarpoq pissutsit meeqqat paaqqinniffinni/suliffeqarfinni il.il. namminersortuni meeqqat eqqarsaatigalugit suliassanik imaaliillaannaq isumagisaqartuni atugaat pineqartunut aamma ilaalersillugit.

Inatsisartut Ombudsmandiat pillugu Inatsisartut inatsisissaattut siunnersuut manna inatsisit allannguutaannik taakkuninnga aallaaveqarpoq.

1.2 Inatsisissatut siunnersuummik ataatsimoortumik saqqummiussineq

Inatsisit pillugit nalunaarutit pigineqannginnerat kiisalu inatsisiliornerup paasiuminartuunissaanik kissaateqarneq pissutigalugu allannguutit allannguuteqartitsinissamik siunnersuutikkut saqqummiunneqaratik Inatsisartut Ombudsmandiat pillugu Inatsisartut inatsisissaattut nutaatut siunnersuutikkut ataatsimoortukut saqqummiunneqarput.

2. Inatsisissatut siunnersuummi immikkoortut pingaarnerit

2.1 Pissutsinik kiffaanngissusiiagaasimasut paaqqinniffinni/suliffeqarfinni namminersortuni atugaannik misissuineq

Kalaallit Nunaanni Namminersorlutik Oqartussat kommunillu ataanni ingerlatsiviit ilaat tamarmik Ombudsmandip sulinerani pineqartunut ilaatinneqarput. Taamaalilluni Ombudsmandip suliassaqaarfia pillugu pingaarnertut malittarisassaq paasitinneqarsinnaatitaaneq pillugu inatsisip aamma suliassat sularineqartarnerat pillugu inatsisip atuuffiata oqaatigineqarnerata pissuseqataanik oqaatigineqarpoq. Inatsisartut aamma Inatsisartut ataanni susassaqaartut, Naalagaaffiup Kalaallit Nunaanni ingerlatsivia kiisalu suliffeqarfiit suliniaqatigiiffiillu namminersortut Ombudsmandip pisinnaatitaanerata avataaniipput.

Ombudsmandi pillugu inatsimmi § 16-ikkut aalajangersarneqarpoq Ombudsmandip paaqqinniffiit kiisalu atorfeqarfigisat allat sugaluartulluunniit Ombudsmandip sulinerani pineqartunut ilaatineqartut misissorsinnaagai. Misissuinerit ilaatigut tarnikkut napparsimasut napparsimmavianni aamma meeqqanik inuusuttunillu ulloq unnuarlu paaqqinniffinni ingerlanneqartarput. Ombudsmandi pillugu inatsimmi § 18, imm. 1-ikkut aalajangersarneqarpoq oqartussaasut pisussaaffeqartut paasissutissanik allagaatinik/uppernarsaatinik il.il. Ombudsmandip tunniuteqquusaanik nalunaaruteqarnissaminnut tunniussinissaminnullu. § 18, imm. 2-ikkut aammattaaq aalajangersarneqarpoq Ombudsmandip oqartussaasut allakkatigut oqaaseqaateqaqqullugit piumasaaqateqarfigisinnaagai. Kiisalu § 18, imm. 4-ikkut aalajangersarneqarpoq Ombudsmandip atorfeqarfiit suliffeqarfiilluunniit atorfeqarfiusulluunniit allat sulluunniit misissorsinnaagai ininullu tamanut isersinnaatitaasoq.

Ombudsmandi Naalagaaffiit Peqatigiit naalliutitsisarneq il.il akiorniarlugit isumaqatigiissutaannut ilassut nammineq piumassuseq tunngavigalugu ilannguffigineqarsinnaasoq tunngavigalugu nuna tamakkerlugu pinaveersaartitsisutut Ombudsmandi pillugu inatsisikkut atuuttukkut toqqarneqarpoq, tak. inatsimmi § 17. Nuna tamakkerlugu pinaveersaartitsisoq sulinermini inuttullu arlaannaannulluunniit attuumassuteqartuussanngilaq. Isumaqatigiissummut ilassutip siunertaa tassaavoq periaatsimik sumiiffinnut inuit kiffaanngissusiiagaaffigisaannut nunani tamalaani nunamilu namminermini suliniaqatigiiffiit arlaannaannulluunniit attuumassuteqanngitsut akuttunngitsumik misissuiartortartussamik pilersitsinissaq, naalliutitsisarneq allatullu peqqarniingartumik, inuppalaanngitsumik imaluunniit nikanarsaataasumik pinnittarnerup imaluunniit pillaasarnerup pinaveersaartinneqarnissaat siunertaralugu.

Nuna tamakkerlugu pinaveersaartitsisut sumiiffinni kiffaanngissusiiagaasimasut tigummineqarfiini qanoq pineqarnerinik akuttunngitsumik misissuisarnissamut, kiffaanngissusiiagaasimasut qanoq pineqarnerisa pissutsillu atugaasa pitsaanerulersinneqarnissaat, naalliutitsisarnerup il.il pinaveersaartinneqarnissaat pillugit kaammattuutinik saqqummiussinissamut kiisalu inatsisit atuuttut siunnersuutigineqartullu pillugit siunnersuuteqarnissamut oqaaseqaateqarnissamullu minnerpaaffiatigut pisinnaatitaassapput, tak. isumaqatigiissummut ilassummi artikel 19.

Nuna tamakkerlugu pinaveersaartitsisut piginnaatitaanerminnik naammassisinnaassagunik kiffaanngissusiiagaasut sumiiffiillu tigumminniffiit pillugit paasissutissanik pisariaqartunik tamanik pissarsisinnaassapput kiisalu sumiiffinnut tigumminniffiusunut tamanut kiisalu atortulersuutinut atortorissaarutinullu tamanut isersinnaassallutik, tak. isumatigiissummut ilassummi artikel 20. Nuna tamakkerlugu pinaveersaartitsisup nammineq oqaasissaqarfigisamini nakkutilliisuuffigisaminilu sumiiffinnut tamanut pisortani oqartussaasup aalajangiinera, pisortani oqartussaasup kaammattuinera pisortaniluunniit oqartussaasup akuersinera akuersaarneraluunniit tunngavigalugu inunnik kiffaanngissusiiagaaffiusunut kiffaanngissusiiagaaffiusinnaasunulluunniit isersinnaanera nunat naalagaaffiilluunniit peqataasut tamatumunnga atatillugu isumagissavaat.

§ 7, imm. 1-imi oqaaseqatigiit aappaanni, § 18, imm. 1-imi aamma 2-mi kiisalu § 18, imm. 5-imi aalajangersagassatut siunnersuutit Ombudsmandip Naalagaaffiit Peqatigiit naalliutitsisarneq allatullu peqqarniingartumik, inuppalaanngitsumik imaluunniit nikanarsaataasumik pinnittarneq imaluunniit pillaasarneq akiorniarlugit isumaqatigiissutaannut ilassut tunngavigalugu nuna tamakkerlugu pinaveersaartitsisutut suliasaminik suliarinninnissaminut periarfissaqarnerata qulakkeerneqarnissaa siunertaralugu ikkunneqarput. Nuna tamakkerlugu pinaveersaartitsisoq sumiiffinnut tigumminniffiusunut taakkunungalugu atasumik atortulersuutinut atortorissaarutinullu tamanut isersinnaatinneqassaaq.

Sumiiffiit tigumminniffiusut isumaqatigiissut tunngavigalugu misissorneqartussat paaq-qinniffinnuinaq/suliffeqarfinnuinaq pisortat ingerlatsiviisa ilagisaannut killiligaanngillat. Taamaattumik siunnersuutigineqarpoq Ombudsmandip isumaqatigiissutip atuuffiata iluani pisinnaatitaanerani paaqqinniffiit/suliffeqarfiit il.il. namminersortut pineqartunut aamma ilaatinneqarnerat Ombudsmandi pillugu inatsimmi § 7, imm. 1-imi takuneqarsinnaassasoq.

Ombudsmandip sulinera pissutsit kiffaanngissusiiagaasut paaqqinniffinni/suliffeqarfinni il.il. namminersortuni pisortani oqartussaasup aalajangiinera, pisortani oqartussaasup kaammattuuteqarnera pisortaniluunniit oqartussaasup akuersinera akuersaarneraluunniit tunngavigalugu kiffaanngissusiiiaaffiusuni atugaat pineqartunut ilaalersillugit taamaalilluni siunnersuutikkut annertusineqarpoq. Aalajangersagassatut siunnersutigineqartup oqaasertaasa isumaqatigiissummut ilassummi artikel 4-p oqaasertai assigai. Kiffaanngissusiiiaanermik oqarnermi inummik tigumminniffimmi pisortanit pigineqartumi namminersortumiluunniit kiffaanngissusiiagaasup piumasaminik qimassinnaanngisaani tigumminninneq, parnaarussineq inissiinerluunniit suugaluartoq pineqarpoq, tak. isumaqatigiissummut ilassummi artikel 4.

Ombudsmandi tigumminniffiit inuillu kiffaanngissusiiagaasut pillugit paasissutissanik pis-sarsisinnaassaaq, matumani taakkua qassiussusiat, qanoq pineqarnerat pissutsillu kif-faanngissusiiagaanerup nalaani atorineqartut ilanngullugit eqqarsaatigalugit. Ombudsmandi tigumminniffiusuniinnermini kiffaanngissusiiagaasunik inunnillu allanik kikkunnilluunniit Ombudsmandip paasinninnera malillugu paasissutissanik suliamut attuumassuteqartunik tunniussisinnaasunik nakkutigineqarani ilisimannittoqaraniluunniit oqaloqatiginninnissaminut pisinnaatitaavoq.

Paasissutissanik allagaatinillu il.il. tunniussinissamut nalunaaruteqarnissamullu aamma allakkatigut oqaaseqaatinik suliarinninnissamut Ombudsmandi pillugu inatsimmi atuuttumi § 18, imm. 1 aamma 2 tunngavigalugit pisussaaffeqarneq taamaallaat oqartussaasunut Ombudsmandip sulinerani pineqartunut ilaatinneqartunut atuuppoq. Ombudsmandi pillugu inatsimmi § 7-ip allannguutissaatut siunnersuutigineqartutigit Ombudsmandip sulinerani paaqqinniffinni/suliffeqarfinni il.il. namminersortuni pisortani oqartussaasup aalajangiinera, pisortani oqartussaasup kaammattuuteqarnera pisortaniluunniit oqartussaasup akuersinera akuersaarneraluunniit tunngavigalugu kiffaanngissusiiiaaffiusuni pissutsit pineqartunut aamma ilaatinneqalissapput. Tamatuma nassatarisaanik § 18, imm. 1-imi 2-milu aalajangersakkat allanngortinneqarnissaat siunnersuutigineqarpoq, taamaaliornikkut paaqqinniffiit/suliffeqarfiit il.il. taakku paasissutissanik nalunaarutiginninnissamut allagaatinillu tunniussinissamut pisussaaffeqalersillugit, paaqqinniffiillu/suliffeqarfiillu il.il. taakku allakkatigut oqaaseqaatinik tunniusseqqullugit Ombudsmandi piumasqaateqarsinnaalersillugu.

Ombudsmandi nuna tamakkerlugu pinaveersaartitsisutut sumiiffinnut tigumminniffiusunut taakkualu atortulersuutaannut atortorissaarutaannullu isersinnaatitaassaaq, siusinnerusukkullu

allaaserineqartut paaqqinniffiit/suliffeqarfiit il.il. namminersortut sumiiffillu tigumminniffiusut isumaqatigiisummut ilassummi pineqartunut killilimmik ilaatinneqarput. Taamaattumik Ombudsmandi nuna tamakkerlugu pinaveersaartitsisutut piginnaatitaanermik naammassinnissinnaassappat paaqqinniffinnik/suliffeqarfinnik il.il. namminersortunik taakkuninnga misissuinernik ingerlatsisinnaanera pingaaruteqarpoq. Tamanna tunngavigalugu siunnersuutigineqarpoq Ombudsmandip paaqqinniffinnik/suliffeqarfinnik il.il namminersortunik inuit kiffaangissusiiagaaffiik kiffaangissusiiagaaffigisinnaasaannilluunniit taakkuninnga eqqartuussivik aalajangiiteqqanngikkaluarlugu misissuisinnaaneranut inatsisikkut tunngavissaq pilersinneqassasoq.

Aalajangersakkap taassuma qaqutigunnaq aamma pisuni taamaaliornissaq naalliutitsisarneq allatullu peqqarniingartumik, inuppalaangitsumik imaluunniit nikanarsaataasumik pinnittarneq imaluunniit pillaaarneq akiorniarlugit Naalagaaffiit Peqatigiit isumaqatigiisutaannut ilassut nammineq piomassuseq tunngavigalugu ilannguffigineqarsinnaasoq tunngavigalugu suliassat naammassineqarnissaannut pisariaqartoq naliliisoqaraangat aatsaat atorneqartarnissaa naatsorsuutigineqarpoq.

Inuit Kalaallit Nunaanni Namminersorlutik Oqartussat kommunillu ataanni oqartussaasunit Dronning Ingridip Napparsimmavissuata immikkoortortaqarfiani A 1–imi Nuummiittumi aamma Angerlarsimaffik Isikkivimmi Sisimiuniittumi kiffaangissusiiagaasinnaapput. Taamatut kiffaangissusiianeq tarnikkut napparsimasut pillugit inatsit isumaginninnerluunniit pillugu inatsit tunngavigalugu pisussaavoq. Paaqqinniffinnik/suliffeqarfinnik namminersortunik inuit kiffaangissusiiagaaffigisinnaasaannik massakkut peqanngilaq. Aalajangersagaq taanna ikkunneqarpoq paaqqinniffinnik/suliffeqarfinnik namminersortunik inuit kiffaangissusiiagaaffigisinnaasaannik siunissami pilersitsoqassagalarpat Ombudsmandip paaqqinniffinnik/suliffeqarfinnik taakkuninnga nakkutilliinissamut pisinnaatitaanissaa qulakkeerniarlugu.

2.2. Ombudsmandip pissutsit meeqqat paaqqinniffinni/suliffeqarfinni namminersortuni atugaat eqqarsaatigalugit pisinnaatitaanera aamma tamatumunnga atatillugu nalilersuinissamut tunngavigisaq

Ombudsmandi pillugu inatsimmi § 7, imm. 1-ikkut aalajangersarneqarpoq Ombudsmandip sulinerani “pisortat ingerlatsinerat” kisimi malittarisassatut pingaarnertut pineqartunut ilaatinneqartoq. § 7, imm. 3-kkut aalajangersarneqarpoq ingerlatseqatigiiffiit, suliffeqarfiit/paaqqinniffiit il.il. Ombudsmandip pisinnaatitaanerani pineqartunut ilaatinneqassasut Ombudsmandip aalajangersinnaagaa, malittarisassani tunngavinnilu pisortat ingerlatsinerannut atuuttuni ilanngunneqarnermik annertoqataanik.

Meeqqat Naalagaaffiit Peqatigiit meeqqat pillugit isumaqatigiissutaatigut assigiinngitsunik pisinnaatitaaffilerneqarput. Pisinnaatitaaffiit taakku inatsisiliani atuuttuni aalajangersakkani assigiinngitsuni oqartussaasullu periaasiini ilanngunneqarput. Inatsisiliorneq periaa-serlu tamatumunnga naapertuuttuunersut oqartussaasut ingerlaavartumik naliliiffigisarpaat.

Pisinnaatitaaffiit taakku ataqqineqarnerat pisortani oqartussaasut tunngaviusumik akissusaaffigaat, aammali ataatsimoortut inatsiseqartitsinikkut nammineertut, suliffeqarfiit inuilluunniit ataasiakkaat il.il. suliassanik meeqqat pisinnaatitaaffiit isumaqatigiissut eqqarsaatigalugu attuumassuteqartunik isumagisaqartarput. Inatsisikkut atuuttukkat aalajangersarneqarpoq Ombudsmandip suliffeqarfiit il.il. namminersortut taakku taa-maallaat killilimmik nakkutigisinnaagai, tak. qulaani oqaatigineqartut.

Suliffeqarfiit namminersortut inuillu ataasiakkaat il.il. meeqqat pisinnaatitaaffiit akissusaasusut pisortat ingerlatsinermi oqartussaasuinit annertuutigut nakkutigineqarput, Ombudsmandillu naammagittaalliuutit nakkutilliinermi oqartussaasunut taamaattunut ingerlateqqillugit nassiussinnaavai nakkutilliinermilu oqartussaasut taamaattut piginnaatitaanerminnik ingerlatsineri pillugit naammagittaalliuutit suliarisinnaallugit.

Inuinnarnik suliffeqarfinnillu il.il. nakkutilliinermi oqartussaasut aqutugalugit toqqaannangitsumik nakkutilliineq pisut ilaannaanni Naalagaaffiit Peqatigiit kaammattuuttaasa eqqortinneqarnissaannut naammattussaannigilaq. Ombudsmandeqarnermik aaqqissuussineq sunniuteqarluassappat Ombudsmandip pineqartunik taakkuninnga qitiusumik suliassa qarfinni toqqaannartumik nakutilliisinaanera piumasaaqataasussaavoq. Apeqqut taanna pillugu aalajangersakkamik sukumiinerusumik tamanna tunngavigalugu ikkussisoqartariaqarpoq.

Ombudsmandip namminersortut eqqarsaatigalugit pisinnaatitaanerata sukumiinerusumik killissalersorneqarnerani matuma allaavigineqarnissaa pissusissamisoortuusaaq, tassalu pingaartumik suliffeqarfiit il.il. – imaassinnaavoq suliassanik allanik ilallugit – meeqqanik isumaginninnissamik immikkut suliassa qartut Ombudsmandip nakkutilliinermi pisinnaatitaanerani pineqartunut toqqaannartumik ilaatinneqartariaqartut.

Ombudsmandilli meeqqat ilaqutariinni qanoq pineqarnerat eqqarsaatigalugu toqqaannartumik pisinnaatinneqarnera pissusissamisoortuunaviannigilaq. Tamanna ilaqutariit mee-rartallit nalinginnaasut eqqarsaatigalugit atuuppoq, aammali ilaqutariit meeqqanik ulluunerani paarsaqartartut il.il. eqqarsaatigalugit suliffillu namminersortut meeqqanut tunngasunik suliqaartartut eqqarsaatigalugit atuulluni. Ombudsmandi suliassa qarfirmik taassuminnga toqqaannartumik nakutilliissappat tamanna annertuallaassaaq.

Ombudsmandip pisinnaatitaanerani manna tikillugu killissalersuineq naapertorlugu tunngavik manna malinneqartariaqarpoq, tassalu suliffeqarfik, kattuffik/suliniaqatigiiffik il.il.

namminersortoq Ombudsmandip pisinnaatitaanerani ilaatinneqaruni tamakkerluni ilaatinneqassasoq. Tamatuma manna nassataraa, tassalu Ombudsmandi soorlu atuarfiit namminersortut eqqarsaatigalugit meeqqat qanoq pineqarnerannik aamma atuarfiup sulisoqarnikkut aningaasaqarnermikkullu iliuuserisaanik ilisimasaqartuusariaqartoq, iliuitsit taakku pissutsinut meeqqanut tunngasunut attuumassuteqartutut oqaatigineqarsinnaappata.

Suliffeqarfiit il.il. namminersortut sorliit Ombudsmandip nakkutilliinerani pineqartunut ilaatinneqarnissaannik naliliinermi ilassutitut piumasaqaataasutut manna isiginiarneqarsinnaavoq, tassalu suliffeqarfiit pineqartut inatsisit il.il atuutereersut tunngavigalugit meeqqanut inuusuttunullu tunngasunik suliaqarnerminnut atatillugu pisortanik inatsiseqartitsineq tunngavigalugu pisussaaffilerneqarsimanersut.

Ataqatigiinneqarnermi tassani meeqqanik inuusuttunillu ikiorsiisarneq pillugu Inatsisartut peqqussutaat nr. 1, 15. april 2003-meersoq kingusinnerusukkut allannguuteqartinneqarsimasoq ilanngutissallugu pissusissamisooruussaaq, kommunalbestyrelsimummi nalu-naarutiginnittussaataaneq tassani aalajangersarneqarsimammat. Peqqussummi oqaati-gineqarpoq kommuninut nalunaarutiginnittussaataanerme kikkulluunniit meeqqap pis-sutsinik meeqqap peqqissusianik ineriartorneraniluunniit ulorianartorsiortitsisunik atu-gaqarluni inuuneranik ilisimasaqartut pineqartut. Tamatuma saniatigut inuit isumaginnittoqarfimmi, atuarfeqarfimmi peqqinnissaqarfimmilu sulisut nalunaarutiginninnissamut sakkortusisamik pisussaaffeqarput.

Inuit ataatsimoortut taakkua nalunaarutiginninnissamut immikkut ittumik pisussaaffeqarnerat ilimaginninnermik matuminnga tunngaveqarpoq, tassalu inuit ataatsimoortut taakkorpiat suliatic pissutigalugit meeqqanut inuusuttunullu akuttunngitsumik attaveqarfiginnittartut, taamaalillutillu taakku meeqqat ataasiakkaat atugaannik atugarissaarnerannullu tunngasunik immikkut ilisimaarinnittuusut. Paaqqinniffiit/suliffeqarfiit il.il. pineqartut suliffigisaasa Ombudsmandip pisinnaatitaanerani pineqartunut ilaatinneqartariaqarnerannik oqarnek tamatuma ikorfartorpaa.

Killissalersuinnermut ilassutissaq meeqqanik pinerliisimanginnermut uppernarsaatit pillu-git malittarisassani nassaarineqarsinnaavoq. Malittarisassat taakku meeqqanik pinerliisimanginnermut uppernarsaatinik piumasaqaateqartussaataaneq pillugu Inatsisartut inatsisaanni nr. 8-mi, 19. maj 2010-meersumi kingusinnerusukkut allannguuteqartinneqarsimasumiipput. Inatsisartut inatsisaat taanna inunnik suliassaminnik sularinninnerminnut atatillugu meeqqanik 15-it inorlugit ukiulinnik toqqaannartumik attaveqarfiginnittartussanik kiisalu inunnik suliassaminnik sularinninnerminnut atatillugu meeqqat 15-it inorlugit ukiullit akornanniittartussanik taamalu meeqqanut taakkununga toqqaannartumik attaveqartarnissaminnut periarfissaqartunik atorfinitsitsinnermut sulisitsinnermullu atatillugu pisortat ingerlatsiviini oqartussaasunit tamanit atorneqartarput.

Meeqqanik pinerliisimanginnermut uppersaasatit pillugit malittarisassat nalunaarutiginninnissamut annertusisamik pisussaaffeqarneq pillugu malittarisassatulli namminersortut soorliit Ombudsmandip pisinnaatitaanerani pineqartunut ilaatinneqartariaqarnerannik taamaallaat takutitseqataasinnaapput. Inuusutissarsiornermi suliffeqarfiit taakku atorfeqartitamik meeraannik paarsisussaannik atorfinitsitsisimanerat pissutiginnarlugu Ombudsmandip pisinnaatitaanerani pineqartunut ilanngutissagaanni, pisinnaatitaanerup upperisarsioqatigiinnut namminersortunut atuutilersillugu annertusineqarnera imaluunniit pisinnaatitaanermi timersoqatigiiffiit timigissartarfillu il.il. taakku inunnit 18-it inorlugit ukiulinnit orninneqartarnerat pissutiginnarlugu ilaatinneqalernerat annertuallaanik nassataqartussaavoq.

Pisuni nalornisoorfiusuni apeqqut Ombudsmandip sulinermini Ombudsmandi nakkutilliinermik aamma ingerlatsissanersoq pisariaqartitsinermik ataatsimut naliliiviginninneq aallaavigalugu aalajangiiffigisariaqarjaa.

Inatsisissatut siunnersuut inatsimmut atuuttumut sanilliullugu	
<i>Massakkut oqaasertalersugaanera</i>	<i>Inatsisissatut siunnersuut</i>
<p>§ 7. Kalaallit Nunaanni Namminersorlutik Oqartussat kommunillu ataanni pisortat ingerlatsinerisa ilaat tamarmik Ombudsmandip sulinerani ilaatinneqarput.</p> <p><i>Imm. 2.</i> Ataatsimiititaliat, namminersortut inuilluunniit ataasiakkaat akornanni saqitsaassutinik isumannaatsumik periaaseqarlutik aalajangiisartut pillugit naammagittaalliuutit Ombudsmandip suliarissanngilai, naak ataatsimiititaliat pineqartut pisumi allami pisortat ingerlatsinerannut ilaasutut isigineqaraluartut.</p> <p><i>Imm. 3.</i> Ingerlatseqatigiiffiit, suliffeqarfiit, peqatigiiffiit, il.il. aqutsinermi allaffissorluni aalajangiinikkut pisortat ingerlatsineranni suliasat suliarineqartarnerat pillugu Inatsisartut inatsisaannut, pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaannut imaluunniit inuit pillugit paasissutissanik nalunaarsuineq pillugu inatsiseqartitsinermut ilanngunneqarpata Ombudsmandi aalajangiisinnaavoq suliffeqarfiit pineqartut tamatuma annertoqataanik Ombudsmandip</p>	<p>§ 7. Kalaallit Nunaanni Namminersorlutik Oqartussat kommunillu ataanni pisortat ingerlatsinerisa ilaat tamarmik Ombudsmandip sulinerani ilaatinneqarput. Pissutsit kiffaangissusiiagaasut paaqqinniffinni/suliffe-qarfinni il.il. namminersortuni pisortani oqartussaasup aalajangiineratigut, pisortani oqartussaasup kaammattuuteqarneratigut pisortaniluunniit oqartussaasup akuersineratigut akuersaarneratigulluunniit kiffaangissusiiagaaffiusuni atugaat Ombudsmandip sulinerani pineqartunut aamma ilaatinneqarput. Pissutsit meeqqat paaqqinniffinni/sulif-feqarfinni meeqqat eqqarsaatigalugit suliassanik imaaliiallaannaq isumagisaqartuni atugaat Ombudsmandip sulinerani pineqartunut aammattaq ilaatinneqarput.</p> <p><i>Imm. 2.</i> Aalajangiisartut, namminersortut inuilluunniit ataasiakkaat akornanni saqitsaassutinik isumannaatsumik periaaseqarlutik aalajangiisartut pillugit naammagittaalliuutit Ombudsmandip suliarissanngilai, naak aalajangiisartut pineqartut pisumi allami pisortat ingerlatsinerannut ilaasutut isigineqaraluartut.</p> <p><i>Imm. 3.</i> Ingerlatseqatigiiffiit, suliffeqarfiit, peqatigiiffiit, il.il. inatsisikkut imaluunniit aqutsinermi allaffissorluni aalajangiinikkut pisortat ingerlatsinerat pillugu inatsiseqartitsinermi atuuttumi malittarisassanut tunngavinnullu tamakkiisumik ilaannakortumilluunniit ilanngunneqarpata Ombudsmandi aalajangiisinnaavoq suliffeqarfiit pineqartut tamatuma annertoqataanik Ombudsmandip sulinerani pineqartunut ilaatinneqassasut.</p>

<p>sulinerani pineqartunut ilaatinneqassasut.</p>	
<p>§ 18. Oqartussat Ombudsmandip sulinerani pineqartunut ilaatinneqartut paasissutissanik allagaatinillu il.il. Ombudsmandip tunniuteqqusaanik Ombudsmandimut nalunaaruteqarnissaminnut tunniussinissaminnullu pisussaataapput. <i>Imm. 2.</i> Ombudsmandip oqartussat sulinermini pineqartunut ilaatinneqartut allakkatigut oqaaseqaateqaqqullugit piunasaqarfigisinnaavai. <i>Imm. 3.</i> Ombudsmandi inunnik misissuinermini pissutsit pingaaruteqartut pillugit eqqartuussivimmi nassuiaateqartussanik aggeqqusisinnaavoq. Nassuiaatit eqqartuussivimmi killisiuisarneq pillugu malittarisassat malillugit saqqummiunneqassapput. <i>Imm. 4.</i> Ombudsmandip atorfeqarfiit imaluunniit suliffeqarfiit atorfeqarfiusulluunniit allat suugaluartut oqartussaasut § 7-imi taaneqartut il.il. suliassaannik ingerlatsiffiusut ornillugit misissuiffigisinnaavai, ininullu ta- manut isersinnaatitaalluni.</p>	<p>§ 18. Oqartussaasut il.il. Ombudsmandip sulinerani pineqartunut ilaatinneqartut paasissutissanik allagaatinillu il.il. Ombudsmandip tunniuteqqusaanik Ombudsmandimut nalunaaruteqarnissaminnut tunniussinissaminnullu pisussaaffeqarput. <i>Imm. 2.</i> Ombudsmandip oqartussaasut il.il. sulinermini pineqartunut ilaatinneqartut allakkatigut oqaaseqaateqaqqullugit piunasaqarfigisinnaavai. <i>Imm. 3.</i> Ombudsmandi inunnik misissuinermini pissutsit pingaaruteqartut pillugit eqqartuussivimmi nassuiaateqartussanik aggeqqusisinnaavoq. Nassuiaatit eqqartuussivimmi killisiuisarneq pillugu malittarisassat malillugit saqqummiunneqassapput. <i>Imm. 4.</i> Ombudsmandip atorfeqarfiit imaluunniit suliffeqarfiit atorfeqarfiusulluunniit allat suugaluartut oqartussaasut § 7-imi taa-neqartut il.il. suliassaannik ingerlatsiffiusut ornillugit misissuiffigisinnaavai, ininullu tamanut isersinnaatitaalluni. <i>Imm. 5.</i> Ombudsmandi tamanna pisariaqartoq naliliisoqarpat sukkulluunniit kinaassutsip ilisarnaataanik pisariaqarneratut annertutigisumik takutitsilluni eqqartuussivillu aalajangiitinnikkaluarlugu paaqqinniffinnik/suliffeqarfinnik il.il. inuit kiffaangissusiiagaaffigisimasaannik kiffaangissusiiagaaffigisinnaasaannilluunni it, tak. § 7, imm. 1-imi oqaaseqatigiit aappaat, aamma paaqqinniffinnik/suliffeqarfinnik namminersortunik il.il. meeqqat eqqarsaatigalugit suliassanik imaaliallaannaq isumaginnittunik, tak. § 7, imm. 1-imi oqaaseqatigiit pingajui,</p>

	misissuiartorluni isersinnaavoq. Politiit misissuinerup ingerlanneqarnerani pisariaqarneratut annertutigisumik ikiutissapput.
	Inatsisissatut siunnersuut 1. juli 2017-imi atortuulersinneqarpoq.

2.3 Oqaaseqaatinik erseqqissaaneq

Inatsisissatut siunnersuutikkut Inatsisartut inatsisaanni § 7, imm. 1-imi aamma § 18-imi allannguuteqartitsisoqassasoq siunnersuutigineqarpoq. Aalajangersakkat pillugit oqaase-qaatit qulaani allaaserineqartut naapertorlugit erseqqissarneqarput. Ombudsmandip sulinera pillugu § 7-imi aalajangersagaq pillugu oqaaseqaatit Ombudsmandi pillugu inatsisip atuuttup atortuulersinneqarnerata kingornatigut inatsisiliorneq akuerineqarsimasoq tunngavigalugu aammattaq nutarterneqarput.

Taassuma saniatigut aalajangersakkat allat pillugit oqaaseqaatit nutarterneqarput, tassami Ombudsmandi pillugu inatsisip atuuttup akuerineqarnerata kingornatigut inat-sisinik allanngortitsisoqartarsimammat, oqaaseqaatit nutarterneqarnissaannik pisariaqalersitsisunik.

Inatsisissatut siunnersuut inatsimmik atuuttumik annertoorujussuartigut ingerlatitseqqinnerummat Inatsisartut Ombudsmandiat pillugu Inatsisartut inatsisaanni nr. 7-mi, 13. juni 1994-imeersumi Ombudsmandi pillugu inatsisikkut massakkut atuttukut atorunnaarsinneqarsimasumi aalajangersakkat pillugit immikkut oqaaseqaatinut innersuussutit peerneqarput.

3. Oqartussaasunut aningaasaqarnikkut aqutsinikkullu kingunerisassai

Siunnersuutip aningaasaqarnikkut pisortanut kinguneqarnissaa naatsorsuutigineqanngilaq.

4. Inuussutissarsiornermut aningaasaqarnikkut aqutsinikkullu kingunerisassai

Siunnersuutip inuussutissarsiornermut kinguneqarnissaa naatsorsuutigineqanngilaq.

5. Avatangiisinut pinngortitamut innuttaasullu peqqissusiannut kingunerisassai

Siunnersuutip avatangiisinut, pinngortitamut inuiaallu peqqissusiannut kinguneqarnissaa naatsorsuutigineqanngilaq.

6. Innuttaasunut aqutsinikkut kingunerisassai

Inatsisissatut siunnersuutip innuttaasunut kinguneqarnissaa naatsorsuutigineqanngilaq.

7. Allatigut annertuunik kingunerisassai

Siunnersuutip allatigut annertuunik kinguneqarnissaa naatsorsuutigineqanngilaq.

8. Oqartussaasunik suliniaqatigiiffinnillu tusarniaaviginninneq

Inatsisissatut siunnersuut piffissami 25. januar.2017-imit 1. marts.2017-imit ukununga tusarniaaatigineqarpoq~~atigineqarpoq~~:

KANUKOKA, Kommune Kujalleq, Kommuneqarfik Sermersooq, Qeqqata Kommunia, Qaasuitsup Kommunia, Siulittaasup Naalakkersuisoqarfia, Namminiilivinnermut, Pinngortitamut, Avatangiisinut Nunalerinermullu Naalakkersuisoqarfik, Aalisarnermut Piniarnermullu Naalakkersuisoqarfik, Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik, Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoqarfik, Peqqissutsimut Naalakkersuisoqarfik, Inuussutissarsiornermut, Suliffeqarnermut, Niuernermut, Nukissiuuteqarnermut Nunanullu allanut Naalakkersuisoqarfik, Aatsitassanut Ikummatissanullu Naalakkersuisoqarfik, Aningaasaqarnermut Akileraartarnermullu Naalakkersuisoqarfik, Ilinniartitaanermut, Kultureqarnermut, Ilisimatusarnermut, Ilageeqarnermullu Naalakkersuisoqarfik, Naalagaaffiup Sinniisoqarfia, Eqqartuussisuuneqarfik, Inissiaatileqatigiiffik INI A/S, Folketingip Ombudsmandia, Kalaallit Nunaanni Politimesteri, MIO, Inuit Pisinnaatitaaffiinnut Kalaallit Nunaata Siunnersuisoqatigiivi, Dansk Institut for Menneskerettigheder, Pinerluuteqarsimasunik Isumaginnittoqarfik kiisalu Justitsministeriaqarfik.

Siunnersuut tamatuma saniatigut piffissami 13. Februar 2017-imit 13. Marts 2017-imit siamasinnerusumik tusarniaassutigineqarpoq. Tamatumani tusarniaavigineqartut ukuullutik:

Nuuk Internationale Friskole, Efterskole Villads Villadsen, Maniitusmi Efterskoli, Mælkebøtten, Akillit, Inuuneq Meeraq Pinngortitarlu, Orpigaq, Pakkutaq, PITU, Qaamasoq, Sikkerneq, Børnehaven Esther, Meeqqerivik Mikisoq, Meeqqerivik Sulunnguit, Meeqqat Illuat (Børnehuset), Perorsaanermik Ilinniarfik (Socialpædagogisk seminarium), Peqqissaanermik Ilinniarfik (Center for Sundhedsuddannelser), NPK, IMAK, SIK, AK, Nanu Børn, Meeqqat Inuunerssut (Bedre Børneliv), GE aamma NUSUKA.

Tusarniaavigineqartut uku siunnersuut pillugu oqaaseqaateqarput:

Namminiilivinnermut, Pinngortitamut, Avatangiisinut Nunalerinermullu Naalakkersuisoqarfik, Naalagaaffiup Sinniisoqarfia, Aatsitassanut Aqutsisoqarfik, Folketingip Ombudsmandia, INI, Peqqissutsimut Naalakkersuisoqarfik, Kalaallit Nunaanni Politimesteri, KANUKOKA, Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoqarfik, IMAK, Qeqqata Kommunia, Siulittaasup Naalakkersuisoqarfia, Institut for Menneskerettigheder, MIO, Eqqartuussissuserisaut kalaallit (Grønlandske Advokater), Aningaasarnermut Akileraartarnermullu Naalakkersuisoqarfik, INI kiisalu GE.

Taakkunanga uku siunnersuummut tapersiinermik ersersitsinerup saniatigut pingaarutilinnik allanik oqaaseqaatissaqanngillat:

Namminiilivinnermut, Pinngortitamut, Avatangiisinut Nunalerinermullu Naalakkersuisoqarfik, Naalagaaffiup Sinniisoqarfia, Aatsitassanut Aqutsisoqarfik, Folketingip Ombudsmandia, INI, Peqqissutsimut Naalakkersuisoqarfik, Kalaallit Nunaanni Politimesteri, IMAK, Qeqqata Kommunia, Siulittaasup Naalakkersuisoqarfia, Institut for Menneskerettigheder kiisalu Eqqartuussissuserisaut kalaallit (Grønlandske Advokater).

Tusarniaanermut akissutit sinnerini immikkoortut pingaarutillit malittuani saqqummiunneqassapput:

Isumaginninnermut, Ilaqutariinnut, Naligiissitaanermut Inatsisinillu Atuutsitsinermut Naalakkersuisoqarfik:

"Ombudsmandi ullumikkut meeqqanik inuusuttunillu ulloq unnuarlu paaqqinnittarfinnik pisortanit ingerlanneqartunik nakkutilliisinnaareerpoq; Naalakkersuisoqarfiup nakkutilliinermut immikkoortortaa ulloq unnuarlu paaqqinnittarfinnik tamanik nakkutilliisussaataareerpoq. Kiisalu Nakorsaaneqarfik, Uumasunik nakkutilliisoqarfik, Suliffeqarnermi nakkutilliisoqarfik allallu assigiinngitsutigut nakkutilliisareerput. Tamatuma nassataanik eqqaamaneqartariaqarpoq ulloq unnuarlu paaqqinnittarfiit – taakku namminersortuuppata pisortanilluunniit ingerlanneqartuuppata – pisortaqarfinnit assigiinngitsunit uteqqiattumik ilaannilu ataatsikoortumik nakkutilliartorfigineqartarsinnaasut. Inatsisip allanngortinneratigut tamakkua saniatigut Ombudsmandip tungaanit paaqqinnittarfinnut namminersortunut sammisumik nakkutilleeriaatsimik allamik eqqussisoqassaaq, taamaammat makku annerusumik eqqumaffigineqarnissaat isumaliutigineqartariaqarpoq:

- 1. Ataqatigiissaarinissaq, taamaalilluni pisortaqarfinnit assigiinngitsunit ataatsikkoortumik nakkutilliartornerit tamanna ajornanngippat pinaveersaartinneqarlutik.*
- 2. Kina sunik nakkutilliisussaataanerata paasiuminarsarneqarnissaa (kia suliassaraa?)*
- 3. Atuuffiit iliuuseqartussaaffiillu paasiuminarsarneqarnissaat*
- 4. Ilisimalikkat katersorneqartut paasiuminartuunissaat.*
- 5. Nakkutilliartortarnernut tunngatillugu oqartussaaffiit assigiinngitsut suleqatigiissinneerisa periarfissaqarnissaa."*

Akissut: Tamatumunga atatillugu Ombudsmandimit, imatut oqaaseqartumit, oqaaseqaatinik pissarsisoqarpoq:

“Kalaallit Nunaanni Namminersorlutik Oqartussat ataanni oqartussaasut arlalit ulloq unnuarlu paaqqinniffinnik nakkutilliisuunerat ilumoorpoq. Ombudsmandi aammattaaq nakkutilliisuvoq, matumani nakkutilliinermi oqartussaasut taaneqartut ilanngullugit eqqarsaatigalugit, tak. Ombudsmandi pillugu inatsimmi § 7, imm. 1. Kalaallit Nunaanni Namminersorlutik Oqartussat ataanni oqartussaasut suleqatigiippata ataqatigiissarippatalu tamatuma pissusisamisoorinnaanera Ombudsmandip eqqumaffigaa, ilaatigullu isumaginninnermut tunngasuni immikkut nakkutilliisoqarfik Ombudsmandip aamma qanimut malinnaaffigaa, matumani tusagassiuutit samminninnerat ilanngullugu eqqarsaatigalugu, taamatuttaarlu Ombudsmandeqarfik nakkutilliisoqarfilla taanna ataatsimiittarsimallutik.

Ombudsmandilli Kalaallit Nunaanni Namminersorlutik Oqartussat kommunillu eqqarsaatigalugit arlaannaannulluunniit attuumassuteqannginnini innarlerneqarsinnaanngissutsilu sukkulluunniit innarlerumangilai, Ombudsmandilu inngerlatsiveqarfimmu attuumassuteqanngilluinnarluni tamatigut nakkutilliisinaanissaminut imminut pisinnaatippoq.”

Aningaasaqarnermut Akileraartarnermullu Naalakkerasuisoqarfik:

”Inatsisissatut siunnersuutip § 26, imm. 1-iani erserpoq Ombudsmandip sulisuni nammineq atorfinitsittasagai soraarsittassallugillu. Taakkulu qassiunissaat, akissarsiaasaat aamma soraarnerussutisiassaat Inatsisartut Suleriaasianni malittarisassat tunngavigalugit aalajangersarneqassasut. Suleriaatsimi § 59, imm. 3-mit aalajangersarneqarpoq Ombudsmandi siunnersuut naapertorlugu sulisussaminik atorfinitsitsillunilu soraarsitsisassasoq. Taamaattorli suleriaatsimi taakku amerlassusissaat pillugu aalajangersagaqanngilaq.

Tamatuma saniatigut suleriaatsip § 59, imm. 4-aani erserpoq Inatsisartut Allattoqarfianni sulisut aammalu Inatsisartut Ombudsmandianni sulisut akissarsiaat Inatsisartut Siulittaasuannit aalajangersarneqartassasut. Ersernerluppoq ”akissarsianik” aningaasarsiat soraarnerussutisiassallu pineqarnersut. Iimagissallugu tunngavissaqarsinnaavoq isumaqatigiissutinik tunngaveqarluni atorfillit soraarnerussutisiassaat akissarsiaasigut aalajangersarneqarsimassasut, ersernerlupporli tamanna immikkut ataasiakkaatut isumaqatigiissuteqarnikkut atorfinitsinneqarnermi atuunnersoq.

Inatsisissatut siunnersuutip § 26, imm. 3-ani tamatuma saniatigut erserpoq, Ombudsmandip naatsorsuutaanik saqqummiussineq kukkunersuinerlu Inatsisartut Suleriaasianni aalajangersarneqassasut. Suleriaatsimi tamanna pillugu aalajangersagaqanngilaq. Aningaasaqarnermut Akileraartarnermullu

Naalakkersuisoqarfiup siunnersuutigissavaa, Ombudsmandip naatsorsuutaanik saqqummiussineq kukkunersiunerlu inatsisikkut erseqqilluinnartumik aalajangersarneqassasut.”

Akissut: Tamatumunga atatillugu Ombudsmandimit, imatut oqaaseqartumit, oqaaseqaatinik pissarsisoqarpoq:

“Suliami illua ’tungiusup isumaanik tusarniaanermut akissummit oqaatigineqartut Ombudsmandi pillugu inatsimmi § 26-p Inatsisartut suleriaasianni immikkoortut arlallit innersuussutigai, taannalu inissisimanerit ilaat taakku aalajangersimasut eqqarsaatigalugit ammavoq.

Inatsisissatulli siunnersuut Ombudsmandi pillugu inatsimmi § 26 inatsiseqartit-sinermut atuuttumut ataneqartillugu allannguutinik imaqaangilaq.”

MIO:

”Aalajangersakkanut ataasiakkaat inatsimmiittunut § 7, imm. 3mut oqaaseqaat: Maluginiarpara, A/S Inissiaatileqatigiiffik INI kisimi taaneqarsimasoq. Taamaattumillu matumuuna Inissiaatileqatigiiffiup ISERIT A/S-ip piunera eqqaasitsissutigissavara. Taamatuttaaq, taassuma tusarniaanermi ilanngunneqarsimannginnera.”

Akissut: Tamatumunga atatillugu Ombudsmandimit, imatut oqaaseqartumit, oqaaseqaatinik pissarsisoqarpoq:

“Ombudsmandip pisinnaatitaanera A/S Inissiaatileqatigiiffik INI aamma ISERIT A/S eqqarsaatigalugit assigiinngilaq. Taamaalilluni ilumoorpoq A/S Inissiaatileqatigiiffik INI Ombudsmandi pillugu inatsimmi § 7, imm. 3 pillugu oqaaseqaatini taaneqarsimammat, inissiaatileqatigiiffilli ISERIT A/S inatsit pillugu oqaaseqaatini taaneqarsimanani.

A/S Inissiaatileqatigiiffik INI eqqarsaatigalugu manna atuuppoq, tassalu A/S Inissiaatileqatigiiffik INI-mi suliasat suliarineqartarnerat paasitinneqarsinnaatitaanerlu pillugit Namminersornerullutik Oqartussat nalunaarutaatigut nr. 37-kkut, 19. december 1996-imeersukkut aalajangersarneqartoq pisortat ingerlatsinnerani suliasat suliarineqartarnerat pillugu Inatsisartut inatsisaanni aamma pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni aalajangersakkat A/S Inissiaatileqatigiiffik INI-mut atuuttut, ingerlatseqatigiiffup inissiaatileqatigiiffimmik pilersitsinissaq pillugu Inatsisartut peqqussutaat nr. 12, 28. oktober 1993-imeersoq tunngavigalugu Namminersornerullutik Oqartussat kommunillu sinnerlugit aalajangiinissamut piginnaatinneqarnerata annertoqataanik.

Nalunaarut taassuma pissuseqataa inissiaatileqatigiiffik ISERIT A/S eqqarsaatigalugu aalajangersarneqarsimangilaq. Ombudsmandip inissiaatileqatigiiffik ISERIT A/S eqqarsaatigalugu pisinnaatitaanera pillugu apeqqut Ombudsmandip 2012-imi ukiumoortumik nalunaarummini allaaseraa. Naammagittaalliuutip suliarineqarnissaa Ombudsmandip itigartitsissutigaa, tassami pisortat ingerlatsiviata ilai tamarmik Ombudsmandip sulinerani pineqartunut ilaatinneqarmata, inissiaatileqatigiiffilli ISERIT A/S pisortat ingerlatsiviata ilaatut isigineqarsinnaanani.”

KANUKOKA:

”Taamaattoq oqaatigineqassaaq § 7, imm. 1-imut oqaaseqaatini, maanna ombudsmand-i pillugu inatsimmi atuuttumi erseqqissaatigineqarmat ombudsmand-ip piginnaatitaaffiit eqqartuussiviit ilaanngitsut. Erseqqissaaneq taanna uteqqinneqanngilaq inatsisissatut siunnersuummi § 7, imm. 1, oqaaseqatigiinni siullerni, kisiannili KANUKOKA-p naatsorsuutigaa pissutsinik piviusunik allannguinnissamik eqqarsartoqanngitsoq.

§ 7, imm. 1-imut aamma § 18-imut allannguutissatut siunnersuutaasunut tulliullugu KANUKOKA imaattunik oqaaseqaateqassaaq:

Siunnersuutigineqartumut Ombudsmand-ip piginnaatitaaffianik annertusisitsinissamat inersimasut ingerlatsivinni namminersortuni inissinneqarsimasut kiffaanngissusiarneqarsimasut ilaalersillugit, ingerlatsivinnilu pineqartuni pissutsit ilanngullugit, Kattuffiup ataatsimut isigisumik maluginiarpa piffissami matumani ingerlatsivinnik pineqartutut ittunik peqanngimmat, kisiannili siunnersuut siunertaqortoq qularnaarinissamik siunissamat, ingerlatsivinnik taamaattunik pilersitsisoqarsinnaaneranut.

Tamanna Danmark-imi pissutsinut sanilliuqqarpas taamani Danmark-imi ombudsmand-i pillugu inatsimmik assigisaanik allannguinnermut, taava takuneqarsinnaavoq piffissami taamani pineqartumi Danmark-imi namminersortunik ingerlatsiveqartoq kiffaanngissusiagaasimasunik tiguisinnaasunik, kisiannili ilimanartoq ingerlatsiviit taamaattut taamani ikittunnguusimassasut. Danmark-imi inatsimmi allanngineq suliarineqarpoq OPCAT artikel 4-mi aalajangersakkat naammassisinnaajumallugit.

KANUKOKA-p oqaatigiumavaa Kalaallit Nunaat inoqarfittut Danmark-imiit minneerarsuummat ikinneerarsuarnik ingerlatsiveqartoq kiffaanngissusiagaasimasunut, KANUKOKA-llu ilisimangilaa namminersortunit ingerlatsivinnik aallartitsiniartoqarnerisooq inersimasunik kiffaanngissusiagaasimasunik tiguisartussanik.

Inersimasunut ingerlatsiviit eqqarsaatigalugit inatsisit maanna atuuttut imminnut pigisutut pilersinneqartartut eqqarsaatigalugit pisortaniit aqutsineq malittarisassiornerlu annertuujuvoq, taamaattut pilersinneqartarneri, ingerlanneqartarneri aamma pisortaniit aningaasalersueqataaffigineqarneri eqqarsaatigalugit.

Namminersortunit ingerlanneqartumik ingerlatsivimmik kiffaangissusiagaasimasunik tiguisartussamik pilersitsisoqarsinnaanera eqqartorneqalissappat taava KANUKOKA-p siunnersuutigissavaa isumaliutigineqassasoq ombudsmand-ip piginnaatitaaffiisa annertusineqarnissaannut taarsiullugu ombudsmand-ip pineqartorpia mut atatillugu isummerfigissagaa ingerlatsiviup pineqartup ombudsmand-ip nakkutilliinerata ataanut inissinneqarnissaa, ombudsmandeqarnermut inatsimmi § 7, imm. 3 naapertorlugu. Tamatumunnga atatillugu KANUKOKA-p innersuutissavaa Danmark-imi ombudsmand-ip piginnaatitaaffiisa annertusineqarnissaannut aalajangersakkami uani pineqartumi tunngaviusimammat, inatsimmi § 7, imm. 4-ap ingerlatsivinnik namminersortunik akulerussisarneq il.il. ombudsmand-ip oqartussaaffiisa iluannut, qaqutiguinnaq atorneqartarsimasoq, nalinginnaasumillu pineqartorpia mut atatillugu inatsisitigut aaqqiissuteqartoqartartoq, qanoq annertutigisumik pisortat malittarisassarititaasa ingerlatsivimmi pineqartumi atortinneqassanersut pillugu. Ilanngullugulu ilutigisaanik tikkuarneqarluni innuttaasunut aamma sulisuusunut inatsisinik eqqortitsiniarluni atuutsitsinikkut assigiinngisitsinerusoq, apeqqutaalluni ingerlatsivik pineqartoq namminersortuunersoq pisortanilluunniit pigineqartuunersoq. Ilimagisariaqarsorinarpoq Kalaallit Nunaanni ingerlatsivinnik namminersortunik pineqartutut pilersitsisoqartarsinnaanera inersimasunut kiffaangissusiagaasimasunut sammisunik qaqutigui- nnaq immikkut ittutigut pisarsinnaassasoq, taamalu isumaliutaasimasut danskit folketingianni aalajangiiniarnermi ombudsmand-eqarnermut inatsimmik 2009-mi allannguinermi pisariaqartitsinngitsut Kalaallit Nunaanni assigisaanik allannguinnissamut, kisiannili Kalaallit Nunaata OPCAT-imi pisussaaffiit naammassisinnaagai tigussaasumik qularnaarinikkut ombudsmand- imit nakkutilliinermik imaluunniit allatut nakkutilliinermik OPCAT-imut naapertuuttumik, soorlu NPM-imik, pisariaqartinneqalissappat ingerlatsivimmik namminersortumik pilersitsinissaq, inersimasunik kiffaangissusiarneqarsimasunik tiguisartussamik.

Tamatumalu saniatigut KANUKOKA-p maqaasivaa inatsisissatut siunnersuummi erseqqissaat ingerlatsivinnut namminersortunut nakkutilliilluni

pulaartarnerni nalilersuisarnerni tunngaviusussaq. Danskit ombudsmand-iannut inatsimmik uani pineqartup assigisaanik akuersissuteqarnermut atatillugu naatsorsuutigineqarpoq ombudsmand-ip danskit eqqartuussiveqarnikkut inatsisinik isumannaarisarnissamut inatsisaanni ileqqussat malittassagai, pinngitsaaliissummik akuleruttoqartarneranut atatillugu, nakkutilliilluni angerlarsimaffinni privatini pulaartarnerni. Kalaallit Nunaanni inatsit pineqartoq taanna atuutinngilaq, taamaattumillu KANUKOKA-p inassutigissavaa inatsisissatut siunnersuummi uani isiginiarneqassasoq ombudsmand-ip nalilersuisarnermini tunngavissai tamatumunnga atatillugu.

Ombudsmand-ip piginnaatitaaffiisa annertusineqarnissaat pillugu siunnersuutaasumut ingerlatsivinnut namminersortunut il.il. atatillugu, meeqqanut tunngasunik suliyanik ingerlatsisuusartunut KANUKOKA-p immikkut oqaatigiumavai:

Matuma assigisaanik Danmark-imi 2012-imi inatsimmik allannguinermut atatillugu ombudsmand- eqarfimmi meeqqanut allaffimmik taamani pilersitsineq aningaasalersorneqarpoq "satspuljemidler" atorlugit, tamannalu inatsimmik allannguinermut taamani tunngaviusut ilaattut erseqqissaatigineqarluni. Inatsisissatut siunnersuummi maanna sammineqartumi ersippoq naatsorsuutigineqanngitsoq siunnersuut pisortanut aningaasatigut kinguneqassasoq. KANUKOKA-p tamanna imatut paasiva naatsorsuutigineqanngitsoq ombudsmand-eqarfimmut nukissanik nutaanik suliassanut nutaanut tunniussisoqarnissaa, ingerlatsivinnut namminersortunut meeqqanut tunngasunik suliassaqartunut atatillugu.

KANUKOKA-p apeqqusertariaqarpaa ombudsmand-eqarfiup ingerlatsinermini nukiit atugassai annertusinagit siunertaqarneris FN-ip meeqqanut isumaqatigiissutaa naapertorlugu Kalaallit Nunaata pisussaaffii tunngavigalugit ombudsmand-i pisussaaffilissallugu immikkut, meeqqanut ingerlatsivinni namminersortuni inissineqarsimasunut atatillugu. Naliliinermit matumunnga atatillugu, aammali naliliinermit nukissanik annertunerusunik tunniussisoqartariaqarneris, FN-ip meeqqanut tunngasumik isumaqatigiissutaata naammassineqarnissaanut, KANUKOKA-p innersuutissavaa allaffissornikkut ingerlatsivimmik pilersitsisoqareermat meeqqanut tunngasumik siunnersuisoqatigiinnik aamma meeqqat oqaaseqartartuannik inuttaqartumik, - naak taanna - eqqaaneqartut allaffissornikkut aqqissuussinerugaluartoq, - kisianni ombudsmand-itut inatsisitigut arlaannaannulluunniit atasuunani inissisimannikkaluartoq. Ombudsmand-illi meeqqat oqaaseqartartuata meeqqallu pillugit

siunnersuisoqatigiit sulinerat malinnaavigai. KANUKOKA-p ataatsimut isigisumik nalilerpaa nunami Kalaallit Nunaattut innuttaqarturni aningaasatigut nukiit nakkutilliinemut allaffissornikkullu nalunaarsuinernut atugassiissutaasut oqimaalutarneqartariaqartut, meeqqat inatsisitigut illersugaanerannut meeqqanullu toqqaannartumik iluaqutissannqortinneqartartunut sanilliussilluni.

KANUKOKA-p tulliullugu maluginiarpaa Folketing-ip ombudsmand-iata suliassami annertunerulersinneqarnerannut atatillugu, meeqqat pisinnaatitaaffiinut tunngasumik, immikkut suliassinneqarmat nakkutilliinermik (malinnaanermik) inatsisit atuuttut imaluunniit allaffissornikkut aalajangersakkat Danmark-ip nunarsuarmiut akornanni pisussaaffiinut meeqqat pisinnaatitaaffiinut atasumik naapertuuttuunersut pillugit. Tamatuma assinganik siunnersuummik kalaallit ombudsmand- iannut atasumik inatsisissami ilanngussisoqarsimangilaq.

KANUKOKA-p pissusissamisoortutut isigaa Inatsisartut ombudsmand-iat immikkut suliassaqaassappat meeqqat piginnaatitaaffiinut attuumassuteqartunik, taamaattoqassappallu aalajangersakkamik pilersitsisoqartariaqarpoq danskit ombudsmand-iannut inatsimmi § 12, imm. 2-p assigisaanik, KANUKOKA-p aamma kommunit ajorluartumik misigisarmassuk fagitigut aamma inatsisit aamma allaffissornermi malittarisassat meeqqanut atuuttut ajorpallaarujussuuartartut, taamaattumillu malittarisassanik pineqartunik pitsaassusilersuiniarluni suliaqartoqartariaqartoq.”

Akissut: Tamatumunga atatillugu Ombudsmandimit, imatut oqaaseqartumit, oqaaseqaatinik pissarsisoqarpoq:

A) Eqqartuussiviit

Ombudsmandip eqqartuussivinnut tunngatillugu piginnaatitaaffeqannginnerata inatsimmut nassuiaatini erseqqissaatigineqannginnera eqqorpoq. Tamanna Ombudsmandip Inatsisartunut taakkulu ataatsimiititaliaannut piginnaatitaaffeqannginneranut tunngatillugu siusinnerusukkut oqaatigineqarpoq. Taamatut inissiineq inatsimmut nassuiaatit aaqqissuuteqannginneranni tulluannngitsutut nalilerneqarpoq. Naalagaaffiup Kalaallit Nunaanni ingerlatsinerata Ombudsmandip piginnaatitaaneranut ilaanginneranik nassuiaatit apeqqummut saqqummiunneqartumut matussusiisutut isigineqarput. Taamaattorli eqqartuussiviit immikkut ersarissumik taaneqartariaqartut naliliisoqarpat Ombudsmandi tamatumunnga oqaaseqaatissaqanngilaq.

B) Piginnaatitaanermik apeqqu

Ombudsmandip piginnaatitaaffiata inersimasunut kiffaanngissusiagaasunut paaqqinnittarfinniittunut aamma atuuttussanngorlugu annertusineqarnissaanik imaqartumik Ombudsmandi pillugu inatsisip allanngortinneqarnissaanik siunnersuut inatsisip siunissami atorneqarsinnaanissaanik qulakkeerinninnerummat ilumoorpoq. Tamanna inatsimmut nassuiaatini erseqqilluinnartumik allassimareerpoq. Tassunga taarsiullugu piginnatitaaffimmik apeqqu § 7, imm. 3 naapertorlugu Ombudsmandimit suliarineqartarnissaanik KANUKOKA-p siunnersuutaa periarfissaagaluarpoq, tamannali Ombudsmandimit tapersersornartinneqanngilaq. Ombudsmandip piginnaatitaaffik pillugu apeqqu piffissaalluatillugu aaqqiivigisimanngikkaluarpagu Ombudsmandi taamak iliorsimasinnaagaluarpoq.

C) Nalilersuinissamut tunngavissaq

Nalilersuinissamut tunngavissanik amigaateqarnermik oqaaseqaatinut tunngatillugu isumaqarnarpoq tamanna inatsimmut nassuiaatini ilanngunneqartariaqanngitsoq, naak inatsisitigut illersugaaneq pillugu inatsisip Kalaallit Nunaannut atuutinnginnera ilumooraluartoq. Aalajangersakkakut siorngerniarneqartutut paaqqinnittarfinnik taamaattunik nunatsinni pilersitsisoqarnissaanut nalilersuinermut tunngavissap inissinneqarnissaa utaqqinneqartariaqartoq isumaqarnarpoq.

D) Meeqqat illersuisuat

Aningaasanik sulisussanillu immikkoortitsinissamik apeqqu inatsimmut nassuiaatini oqaatigineqanngilaq, Inatsisartummi Meeqqat Illersuisuannik pilersitsinerannut kiisalu Inatsisartut isumaginninnikkut suliassa qarfimmi nakkutilliinermut immikkoortortamik pilersitsinerannut atatillugu Ombudsmandi isumaqarmat suliassap eqqaaneqartup isumaginissaanut sulisussanik aningaasanillu allanik immikkoortitsisoqarnissaa pisariaqavinngitsoq.

E) Nunat tamalaat akornanni pisussaaffiit

Inatsisit atuuttut allaffissornikkulluunniit aalajangersakkat Kalaallit Nunaata nunat tamalaat akornanni pisussaaffiinit naapertuunnerinik nakkutilliinermik suliassaq inatsisip allannguutissaatut siunnersuummi ilanngunneqanngilaq. Ombudsmandip suliassa qarfimmi tassani piginnaatitaaffiata annertusineqarnissaata inatsisissatut siunnersuummi siunertarineqannginneranut tamanna takussutissaavoq, taamaattorli soorunami Inatsisartut tamanna pillugu allatut aalajangersinnaapput.

GE:

“§ 7, imm. 1, malillugu piunasaqaataavoq kiffaangissusiagaaneq, pisortani oqartussaasup aalajangiineratigut, pisortani oqartussaasup kaammattuuteqarneratigut pisortaniluunniit oqartussaasup akuersineratigut akuersarneratigulluunniit, pisimassasoq.

Eqqartuussivimmit aalajangiineq aalajangersakkamut ilaatinneqarnersoq ersernerluppoq ?

Tamanna aalajangersakkakut erseqqissaatigineqartariaqaralarpoq minnerpaamilluunniit § 7, imm. 1, immikkoortup aappaatut.”

Akissut: Tamanna pillugu KANUKOKA’p tusarniaanermut akissuteqaataanut akissuteqarnermi nassuiaateqartoqarpoq.

Taamaattumik tusarniaanermut akissutit tunngavigalugit siunnersuummi allannguisoqanngilaq.

Siunnersuummi aalajangersakkat ataasiakkaat pillugit oqaaseqaatit

Kapitali 1 - Inatsisartunut tunngasut

§ 1 pillugu

Imm. 1 pillugu.

Ombudsmandip piffissamik Inatsisartut qinigaaffiannik malinninnera pillugu aalajangersakkap allannqortinneqarani ingerlateqqinneqarnissaa siunnersuutigineqarpoq.

Imm. 2 pillugu.

Ombudsmandip Inatsisartunit tatigineqarunnaaruni Inatsisartunit soraarsinneqartarnissaa pillugu malittarisassap allannquteqarani ingerlateqqinneqarnissaa siunnersuutigineqarpoq.

Ombudsmandimik qinersinermi soraarsitsinermilu periaaseq pillugu aalajangersakkat siunnersuummi sukumiinerusumik allaaserineqanngillat, aalajangersakkammi taamaattut Inatsisartut suleriaasiatigut aalajangersaavigineqarmata.

§ 2 pillugu

Inatsisartut Inatsisinut Ataatsimiititaliaat, imaanngitsoq Inatsisartut Siulittaasoqarfiat, tassavoq Ombudsmanditut suliamik kia suliaqarallarnissaanik aalajangiisusaaq, Inatsisartut katersuunnissaasa Ombudsmandimillu nutaamik qinersinissaasa tungaanut.

Tamanna Inatsisartut Inatsisinut Ataatsimiititaliaata Ombudsmandip sulineranut ataatsimiititaliatut oqartussaataitaasutut qinerneqarneranik Inatsisartut aalajangernerata 26. oktober 1995-imeersup nassataraa.

§ 3 pillugu

Imm. 1 pillugu

Aalajangersakkakkut tassuuna Ombudsmandi Inatsisartunut, Naalakkersuisunut taamatullu kommunalbestyrelsinut nunaqarfinnilu aqutsisunut qinigaanissamut mattunneqanngitsoq, kisiannili Ombudsmandi qinigaaguni Ombudsmanditut sulinerminik ingerlatseqqissinnaanngitsoq erseqqissarneqarpoq.

Ombudsmandi piffissap qinigaaffiup ingerlanerani suliaasanut taamaattunut qinigaaguni tunuartariaqarpoq. Aalajangersakkami kommunalbestyrelsit nunaqarfinnilu aqutsisut pineqarput.

Imm. 2 pillugu

Aalajangersakkakut tassuuna aalajangersarneqarpoq Ombudsmandi inatsisilerituutut soraarummeernermi angusisimasuussasoq.

§ 4 pillugu

Imm. 1 pillugu

Aalajangersagaq taanna Ombudsmandip atorfimmit soraarnissamik nammineq kissaateqarneranut tunngavoq. Aalajangersakkakut erseqqissarneqarpoq Ombudsmandip qaammatinik arfinilinnik piffissaqartitsilluni qaammatip naanerani soraarsinneqarnissani piumasagaatigisinnaagaa.

Imm. 2 pillugu

Aalajangersakkap pingaartumik nassataraa Inatsisartut katersuunneranni, piffissami Ombudsmandip qinnuteqaateqareermigut imaluunniit utoqqalinini pissutigalugu soraarnissaata siornaniittumi qaninnerpaami, Inatsisartut Ombudsmandimik nutaamik qinersissasut. Ombudsmandip 65-inik ukioqalernermini pinngitsoorani soraarninngornissaanik aalajangersakkap maannamut atuuttup atatiinnarnissaa siunnersuutigineqarpoq, tamatumalu nassataraa inuup 65-inik ukioqalereersimasup Ombudsmanditut sulinissaminut qinigaasinnaanginnera.

§ 5 pillugu

Imm. 1 pillugu

Aalajangersakkamit erserpoq Ombudsmandimut taartaasartoq Inatsisartunut qinersereernikkuinnaanngitsoq, aammali atorfiup inuttaarunnerani, qinerneqartassasoq. Ombudsmandimut taartaasartumik atorfiup inuttaarunnerani qinersineq Inatsisartut nalinginnaasumik katersuunnerannut tulliuuttumut siullermut nalinginnaasumik utaqqimaarunneqarsinnaasussaavoq.

Imm. 2 pillugu

Aalajangersakkamut tunuliaqutaasoq pisortat ingerlatsineranni inatsiseqartitsineq naapertorlugu suliami peqataasinnaanissaq pillugu nalinginnaasumik tunngavissaqarnerup manna kinguneraa, tassalu inuk suliap suliarineqarnerani peqataasinnaanngitsoq suliap suliarinerani sugaluartuniluunniit peqataassanngitsoq. Tamatuma kingorna suliap suliarineqarnerani peqataasinnaanngitsumut suliassiisup, pisumi matumani Inatsisartut Inatsisinut Ataatsimiititaliaata, isummerfigisassarilissavaa suliaq qanoq iliorluni suliarineqassanersoq.

Ombudsmandip suliami peqataasinnaannginnerminik nalunaaruteqarnerata kingunerisaanik, Ombudsmandip sulisui suliamik pineqartumik sutigulluunniit suliaqarnissaminnut peqataasussaajunnaassapput. Taamaattorli Ombudsmandi taassumaluunniit sulisui,

Ombudsmandimut taartaasartup tamatuminnga qinnutigisaqarneratigut, suliame sulissutiginninnernik sullissinerinnaviusunik suliaqarsinnaapput, soorlu allagaatinik nutserinermik, suliame allagaatinik aalajangersimasunik assigisaannillu pissarsiniarnernik.

Aammattaaq aalajangersakkap periaaseq maannamut atorneqartoq, Ombudsmandip aamma Inatsisartut Inatsisinut Ataatsimiititaliaata akornanni isumaqatigiissutigineqarsimasoq manna, inatsisikkut aalajangersaavigaa, tassalu suliassat, Ombudsmandip suliame peqataasinnaanginnerminik nalunaaruteqarfigisai, Inatsisartut Inatsisinut Ataatsimiititaliaanut nassiunneqartassasut.

Imm. 3 pillugu

Ombudsmandip atorfianut akuersinermik nalunaaruteqarnissamut pisinnaatitaaneq Inat-sisinut Ataatsimiititaliamut tunngatinneqassasoq siunnersuutigineqarpoq, tassaasoq Inatsisartuni ataatsimiititaliaq Ombudsmandip sulinera pillugu apeqqutinik ilaatigut sularinnittartuusooq. Aalajangersakkakut erseqqissarneqarpoq peqatigiiffimmi suliaqarnissaq pillugu Ombudsmandi Inatsisinut Ataatsimiititaliap akuersissutaanik pissarsisassasoq.

Aalajangersagaq taanna Ombudsmandip arlaannaannulluunniit attuumassuteqartuunnginnissaanik piunasaqaateqarnermut ataneqartillugu isiginiarneqassaaq.

§ 6 pillugu

Imm. 1 pillugu

Ombudsmandip Inatsisartunut attuumassuteqannginnerata pingaartumik kinguneraa Inatsisartut Ombudsmandi suliame aalajangersimasumik suliaqaqqullugu peqqusinnaangimmassuk, Ombudsmandi suliame suliaqaqqunagu inertersinnaangimmassuk imaluunniit Ombudsmandi peqqusinnaangimmassuk suliame suliaqarneq aalajangersimasumik inernilerneqassasoq.

Arlaannaannulluunniit attuumassuteqannginneq atorneqarnermini Inatsisartut ataatsimiititaliaasa Ombudsmandip oqaaseqaataanik isummerfiginnittannginnerisigut imaluunniit isornartorsiuisannginnerisigut erseqqissarneqartarpoq.

Inatsisartut Ombudsmandeqarfik aqutigalugu ingerlatsinermik nakkutiginninnerisa sania-tigut nakkutilliineq Inatsisartut ataatsimiititaliaasa Naalackersuisunut ilaasortanik isumasioqateqartarnerisigut taamatullu ataatsimiititaliat suliame Inatsisartut Naalackersuisullu pillugit Inatsisartut inatsisaat nr. 26, 18. november 2010-meersoq Inatsisartullu Suleriaasiat naapertorlugit allatigut suliaqartarnerisigut pisarpoq. Inatsisartut aalajangissappassuk ataatsimiititaliarsuit (kommissionit) misissuisartussat pillugit inatsiseqartitsinermik atortuulersitsisoqassasoq, Inatsisartut nakkutilliinerat taamatutaaq taakkunatigut ingerlanneqarsinnaasassaaq.

Inatsisartut taakkualuunniit ataatsimiititaliaasa suliamut Ombudsmandip suliassamik suliagalernissaanik imaluunniit suliap suliarineranik ingerlatsiinnarnissaanik mattussisumik isummersimasinnaanerannik nalornissuteqalersinnaanerit ikilisinniarlugit Inatsisartut Inatsisinut Ataatsimiititaliaata Ombudsmandillu 1998-imi majip qaammataani suleqatigiinnissamik isumaqatigiissuteqarnermi isumaqatigiissutigisimavaat, ilaatigut Ombudsmandip matuminnga apeqquilliissutini Inatsisartut Inatsisinut Ataatsimiititaliaannut ingerlatittassagai, assilinerata ataatsimiititaliamut allamut pineqartumut nassiullugu, ilaatigullu Inatsisartut Inatsisinut Ataatsimiititaliaata suliamik ataatsimiititaliami oqaluuserinninnerup inernerata pillugu Inatsisartut ataatsimiititaliaasa allat Ombudsmandimut nalunaarutaannik akunnermiliuttuuneq ataqatigiissassagaa. Inatsisartut Inatsisinut Ataatsimiititaliaata Ombudsmandillu suleqatigiinnissamik isumaqatigiissutaat Ombudsmandip 1998-imi ukiumoortumik nalunaarutaani naqitigaavoq, tamatumani tak. kalaallisuuani quppernerit 11 tulluilu aamma qallunaatuani quppernerit 11 tullialu.

Ombudsmandip Atorfeqarfiata siunertaa naalakkersuinikkullu arlaannaannulluunniit attuumassuteqartuunnginnera erseqqissarniarlugit naatsorsuutigineqarpoq Inatsisartut Ombudsmandi suliame annertunerusumik iliuuseqaaqqissinnaajunnaarsillugu suliag pillugu isummersimanersut Ombudsmandip suliani ataasiakkaani nammineq naliliiffigissagaa.

Imm. 2 pillugu

Aalajangersakkap taassuma Inatsisartut Ombudsmandip sulineranut aalajangersakkanik nalinginnaasunik aalajangersaanissaq kingusinnerusukkat kissaatigilissagaluarpassuk taamanikkussamut iliuuserisassat pisariillisarpei.

Kapitali 2 - Ombudsmandip pisinnaatitaanera

§ 7 pillugu

Imm. 1 pillugu

Imm. 1-imi oqaaseqatigiit siulliit pillugit

Aalajangersakkami oqaatigineqarpoq oqartussaataasunut sorlernut tunngasumik Ombudsmandi pisinnaatitaasoq. Aalajangersakkamit erserpoq Ombudsmandip sulinerani malittarisassaq pingaarneq tassaasoq pisortat ingerlatsinerat. Taamaalilluni Ombudsmandip Inatsisartunut taakkualu ataatsimiititaliaannut tunngasuni pisinnaatitaannginnera ataannarpoq.

Ombudsmandip Inatsisartunut attuumassuteqartuunnginnini pissutigalugu Inatsisartut sulinerat isummerfigisinnaanngilaa, taamaattumillu Inatsisartut ataatsimiititaliaat avavartut imaluunniit ataatsimiititaliarigallagaat Ombudsmandip sulinerata avataaniipput. Inatsisartuni aqutsineq tamatuma pissuseqataanik Ombudsmandip sulinerata avataaniippoq.

Naalagaaffiup Kalaallit Nunaanni ingerlatsinera Inatsisartut Ombudsmandiata pisinnaatitaanerani pineqartunut ilaangilaq, Folketingilli Ombudsmandiata pisinnaatitaanerani pineqartunut ilaalluni.

Imm. 1-imi oqaaseqatigiit aappaat

§ 7, imm. 1-imi oqaaseqatigiit aappaanni aalajangersagassatut siunnersuutikkut imaalissaaq pissutsinik kiffaanngissusiiagaasut paaqqinniffinni/suliffeqarfinni il.il. namminersortuni atugaannik misissuineq Ombudsmandip pisinnaatitaanerani pineqartunut ilaatinneqartoq. Taamaaliornikkut Ombudsmandip Naalagaaffiit Peqatigiit naalliutitsisarneq allatullu peqqarniingartumik, inuppalaanngitsumik imaluunniit nikanarsaataasumik pinnittarneq imaluunniit pillaaarneq akiorniarlugit isumaqatigiissutaanut ilassut nammineq piumassuseq tunngavigalugu ilannguffigineqarsinnaasoq tunngavigalugu suliassaminik aamma paaqqinniffinni/suliffeqarfinni namminersortuni naammassinnissinnaanera qulakkeerneqarpoq.

Misissuinerit kiffaanngissusiiagaasut naalliutitsinermut allatullu peqqarniingartumik, inuppalaanngitsumik imaluunniit nikanarsaataasumik pinnittarnermut imaluunniit pillaaarnermut illersorneqarnerat pisariaqarpat nukittorsarniarlugu ingerlanneqassapput.

Kiffaanngissusiiaanermik oqarnermi inummik pisortat namminersortulluunniit tigumminiffiutaanni kiffaanngissusiiagaasup sukkulluunniit qimassinnaanngisaani tigummininneq sunaluunniit eqqarsaatigineqarpoq, tak. isumaqatigiissummut ilassummi artikel 4. Kiffaanngissusiiasoqarnissaanik aalajangiineq pisortami oqartussaasumi pisimassaaq, pisortani oqartussaasumit kaammattuutigineqarsimassalluni pisortaniluunniit oqartussaasumit akuerineqarsimassalluni akuersaarneqarsimassalluniluunniit.

Ombudsmandip naalliutitsisarnermik il.il. akiuiniarluni isumaqatigiissummut ilassut tunngavigalugu misissuinerimik ingerlatsinerani kiffaanngissusiiagaasut paaqqinniffinni/suliffeqarfinni il.il. namminersortuni qanoq pineqarnerannik misissuineq pineqartunut aamma ilaalissaaq, matumani tigumminiffiusartunut tamanut taakkualu atortulersuutaannut atortorissaarutaannullu isersinnaatitaaneq kiisalu sorlernik misissuinissamut inunnillu oqaloqateqarnissamut kiffaanngissuseqarneq ilanngullugit eqqarsaatigalugit. Ombudsmandi tamatumunnga atatillugu tigumminiffiit inuillu kiffaanngissusiiagaasut pillugit paasissutissanik pissarsisinnaatitaassaaq, matumani kiffaanngissusiiagaasut qas-siunerat, qanoq pineqarnerat pissutsillu atugaat ilanngullugit eqqarsaatigalugit. Ombudsmandi misissuinermini nakkutigineqarani ilisimannittoqaranilu kiffaanngissusiiagaasunik inunnillu allanik kikkunnilluunniit paasissutissanik suliamut attuumassuteqartunik tunisisinnaasutut isigisaminik oqaloqateqarsinnaatitaavoq.

Imm. 1-imi oqaaseqatigiit pingajui

§ 7, imm. 1-imi oqaaseqatigiit pingajuini aalajangersakkakkut siunnersuutigineqartukkat

pissutsit meeqqat paaqqinniffinni/suliffeqarfinni il.il. namminersortuni meeqqat eqqarsaatigalugit suliassanik imaaliannaq isumaginnittuni atugaat Ombudsmandip pisinnaatitaanerani pineqartunut aamma ilaalersinneqarput.

Aalajangersakkap manna nassataraa, tassalu “paaqqinniffiit/suliffeqarfiit il.il. namminersortut” Ombudsmandip pisinnaatitaanerani pineqartunut ilaatinneqartut. Tassani aamma ilaavoq Ombudsmandip inuit ataasiakkaat, matumani ilaqtariit meerartallit nalinginnaasut ilanngullugit eqqarsaatigalugit, pisinnaatitaannginnera.

Paaqqinniffik/suliffeqarfik ataatsimoortulluunniit inatsiseqartitsinikkut nammineertut allat pineqarpata pineqartut taakkua qanoq sukumiinerusumik aaqqissuussaanagerat, soorlu ingerlatseqatigiiffittut imaluunniit aningaasaateqarfittut, tunngaviatigut sunniuteqanngilaq/apeqqutaanngilaq.

Tunngaviosorli unaavoq “meeqqat eqqarsaatigalugit suliassanik imaaliannaq” isumaginninnerup pineqarnera. Tassuuna erseqqissarneqarpoq paaqqinniffik/suliffeqarfik il.il. pineqartoq Ombudsmandip pisinnaatitaanerani pineqartunut ilaassaguni meeqqanut ulluinnarni attuumassuteqangaatsiassoq.

Paaqqinniffik/suliffeqarfik il.il. namminersortoq oqaatigineqartut tungavigalugit Ombudsmandip pisinnaatitaanerani pineqartunut ilaaguni tamarmiulluni ilaana atuuppoq, pissutsinut meeqqat atugaannut attuumassuteqartutut oqaatigineqarsinnaaguni. Soorlu atuarfiit namminersortut eqqarsaatigalugit Ombudsmandi meeqqat qanoq pineqarnerannik atuarfiullu sulisoqarnikkut aningaasaqarnikkullu iliuusaanik pissutsinut meeqqat atugaannut annertumik sunniuteqartunik ilisimasaqassasoq/paasisimasaqassasoq piima-saqataavoq.

Ombudsmandili soorlu apeqqutit sulisoqarnermut tunngasut meeqqanik pinninnermut attuumassuteqanngitsut eqqarsaatigalugit pisinnaatitaanaviannngilaq.

Ombudsmandip pisinnaatitaanerani nalornisoortit pillugit apeqqutit Ombudsmandimit ulluinnarni sulinermi aalajangiiffigineqassapput, ataatsimut naliliineq aallaavigalugu.

Imm. 2 pillugu

Aallaavik una aalajangersakkakut tassuuna erseqqissarneqarpoq, tassalu Ombudsmandip ataatsimiititalianut aalajangiisartunullu il.il., inuinnat akornanni saqitsaassutinik aaqqiisartunut, tunngasumik pisinnaatitaanermi maannamut killiliussimasaa inatsisikkut aalajangersarneqartoq.

Ombudsmandip pisinnaatitaanerata, Ombudsmandip pisinnaatitaaffiginngisaanik aalajangersakkami taaguinikkut killiliivigineqarnissaa siunnersuutigineqarpoq, taamaalilluni Ombudsmandi pisortat aalajangiisartuisa toqqissisimanartunik periaaseqarlutik

aalajangiisartut, tassa assersuutigalugu imaappoq eqqartuussivinnut assingusunut eqqartuussisunillu ilaasortaaffigineqarajuttartut, eqqarsaatigalugit pisinnaatitaassanani.

Ombudsmandi, soorlu tamanna Ombudsmandip nalunaarutaanit oqaaseqaataanillu ersertoq, maannamut pisinnaatitaanerminik killiliisimavoq oqartussaaffiup pineqartup suliaanik, katitigaanerani aaqqissuussaanikkullu inissisimanerani pisuni pineqartuni naliliineq tunngavigalugu.

Taamaalilluni Ombudsmandi oqartussaaffiit makkua pillugit naammagittaalliuutinik suliaqarnermut tunngasumik pisinnaatitaasutut imminut isigivoq:

- oqartussaaffiit aqutsinermi allaffissornermik suliaqartartut, ingerlatsinermi oqartussaasut suliassaannut assingusunik suliaqartartut, assersuutigalugu akuersissutinik, tapiissutinik imaluunniit taarsigassarsinissamik qinnuteqaatinik suliaqartartut, assersuutigalugu Inuussutissarsiutitigut Tapersiisarnermut Ataatsimiititaliaq (takuuk kinguliiniittut) aamma Immikkut Ikiorsiisarnermi Aningaasaateqarfiusoq,
- oqartussaaffiit pisortani oqartussaasut aalajangiinerinik naammagittaalliuuteqartarfittut ingerlasut, assersuutigalugu Isumaginninnermi Naammagittaalliuuteqartarfik, Ilinniagaqarnersiuteqartitsinermi Naammagittaalliuuteqartarfik aamma Ineqarneq pillugu Maalaaruteqartarfik,
- oqartussaaffiit ajornartorsiutit illua'tungeriit marluk akornanni inuit ataasiakkaat pillugit inatsiseqartitsinermit tunngasumik pissusillit aaqqinnissaannik suliallit, oqartussaaffik misissuinissamik nakkutilliinissamillu, pisortanut oqartussaasunut inatsiseqartitsineq naapertorlugu tunngavilinnik, pisussaatinneqarsimappat,
- oqartussaaffiit inatsisinut naapertuutsitsinermik nakkutilliisutut suliaqartut, assersuutigalugu Kalaallit Nunaanni Kommunit Nakkutilliisoqarfiat, aammattaq kinguliiniittut takukkit,
- Oqartussaaffiit suliaqaqatigiissut, taakkunani Inatsisartunut ilaasortat inatsit naapertorlugu allamilluunniit tunngaveqartumik oqartussaaffik tamaat ilaannaaluunniit ilaasortaaffigalugu, Ombudsmandip 1995-imut nalunaarutaa malillugu immikkut ajornartorsiuteqarfiupput.

Inuussutissarsiutitigut Tapersiisarnermut Ataatsimiititaliamut tunngasumik 1995-imi taamatut ajornartorsiuteqartoqarsimavoq, Ombudsmandilu pisinnaatitaanerminik killiliinermini ima eqikkaasimavoq, ataatsimiititaliaq sulianik ingerlatsinermit oqartussaasut suliassaasa nalinginnaasut assinginik suliaqartartilluni, soorlu ilaatigut qinnuteqaatinik ataasiakkaanik aalajangiisarnermigut, taamaattumillu naalakkersuisut suliassaqarfianni, Inatsisartullu sulinerata nalinginnaasup ilaatut pinnani, suliaqarluni, taava ataatsimiititaliaq Ombudsmandip pisinnaatitaaneranut ilaavoq.

Oqaaseqaammi 1998-imeersumi, Ombudsmandip ukiumut 1998-imut nalunaarutaani eqqartorneqartumi, Ombudsmandi isummernerit taakkununga assingusut tunngavigalugit Kalaallit Nunaanni Kommunit Nakkutilliisoqarfiannut tunngasumik pisinnaatitaasutut imminut isigivoq, tassami Ombudsmandip aamma pingaartissimmagu, siulersorneqarnermik 1994-imi iluarsaaqqinnermi Inatsisartut nakkutilliisoqarfimmi sinniisuutitaasa amerlassutsimikkut ikilisinneqarsimanerat, ilaasortanit amerlanerussuteqartunit 3-nit ilaasortanut ikinnerussuteqartunut 2-nut, Ombudsmandeqarfimmut pilersinneqassamaartumut tunngasumik pisinnaatitaanerup killiliiviginissaa innersuussutigerpiarlugu.

Pisinnaatitaanerup killissalersugaanera pillugu apeqqut naalagaaffimmi oqartussaasut eqqarsaatigalugit aamma atuussimavoq:

Kalaallit Nunaanni Tugassasiuutit pillugit Aalajangiisartut, naalagaaffimmi oqartussaasuusut, Justitsministerip toqqagaannaanik ilaasortaqaartut eqqarsaatigalugit Ombudsmandi 1998-imi pisinnaatitaangitsutut imminut isigisimavoq.

Ombudsmandi tamatuma kingornatigut, tassalu 24. marts 2009-mi, Tusagassiuutit pillugit Aalajangiisartut, Naalakkersuisut tusagassiuisarnermi akisussaassuseqarneq pillugu Inatsisartut inatsisaanni nr. 17-imi, 19. november 2007-imeersumi § 41 tunngavigalugu pilersissimasat eqqarsaatigalugit pisinnaatitaasutut imminut isigilersimavoq. Ombudsmandip aalajangiinera taanna Tusagassiuutit pillugit Aalajangiisartut nutaat suleriaasiat aaqqissuussaannikkullu inissisimanerat pillugit paasissutissat pigineqartut tunngavigalugit pisimavoq, imaammammi Tusagassiuutit pillugit Aalajangiisartut taakku naalagaaffiup Kalaallit Nunaanni Tugassasiuutit pillugit Aalajangiisartuinut tamakkiisumik assersuunneqarsinnaangitsut, Aalajangiisartullu taakku ingerlatsineq pillugu inatsiseqartitsinermi aaq-qiagiinngissutinik aalajangiiviginnittartutut Ombudsmandip sulinerani ilaatinneqartariaqanngitsutut isigineqarnissaannut erseqqissumik tunngavissaqanngimmat.

Inuit normuisa atornerarnerat pillugu Namminersorlutik Oqartussat (siusinnerusukkut Namminersorerullutik Oqartussat) kommunillu sulianik suliarinninneri pillugit naammagittaalliuutit suliarinissaannut Ombudsmandi 2000-imi pisinnaatitaasutut imminut isigisimavoq.

Ombudsmandip Kalaallit Nunaanni Politimesteri 2001-imi nalunaarfigisimavaa nappaatit tunillaassortut akiorniarlugit iliuutsit pillugit Inatsisartut peqqussutaat tunngavigalugu tunillaassortunik nappaalanersuaqarneranut ataatsimiititaliarsuaq Politimesterip aalajangersimasumik siulitittaasuuffigisaa eqqarsaatigalugu Ombudsmandi pisinnaatitaasutut imminut isigisoq, tassami Politimesteri ataqatigiinneqarnermi tassani Namminersorlutik Oqartussat (siusinnerusukkut Namminersorerullutik Oqartussat) sinnerlugit aqutsinikkut

suliassamik isumaginnittuummat.

Imm. 3 pillugu

Aalajangersagaq taanna Ombudsmandip ingerlatseqatigiiffinnut aamma suliffeqarfinnut il.il., inatsisikkut imaluunniit aqutsinermi allaffissornikkut aalajangiinikkut suliassat suliarineqartarnerat pillugu inatsimmi aamma paasitinneqarsinnaatitaaneq pillugu inat-simmi malittarisassanut imaluunniit ingerlatsineq pillugu inatsiseqartitsinermi tunngaviit inatsisikkut aalajangersagaanngitsunut ilanngunneqartunut, naleqqiussilluni pisinnaatitaanerani killissalersuinermi tunngavissaanerusutigut ajornartorsiutinit arlalinnit pilersinneqarsimavoq.

Aalajangersakkakkut tamatumunnga peqatigitillugu tunngaviummik ajornartorsiutaasumik matuminnga aaqqiinarneq siunertarineqarpoq, tassalu Naalackersuisut Ombudsmandip pisinnaatitaaneranut ilaatinneqartut ataqatigiinneqarnermi allami Ombudsmandip pisinnaatitaanera pillugu aalajangiisinnaaneranik. Iliuseqarniarnerit Ombudsmandip pisinnaatitaanerata annertussusissaa pillugu aalajangernernut tunngassuteqartut Inatsi-sartunit aallaaveqartariaqarput, Naalackersuisunit pinnatik.

Suliassat suliarineqartarnerat pillugu inatsimmi aamma paasitinneqarsinnaatitaanermik inatsimmi § 1, imm. 2 Naalackersuisut ingerlatsinermut inatsisit ingerlatseqatigiiffinnut, peqatigiiffinnut il.il., erseqqinnerusumik taaneqartunut, pisortat ingerlatsinerannut ilaa-sutut naatsorsuunneqarsinnaanngitsunut, tamakkiisumik ilaannakortumilluunniit atortuutinneqarnissaat pillugu malittarisassanik sukumiinerusunik aalajangersaanissaannut piginnaatitsissummik imaqarput.

Piomasagaatit suliassat suliarineqartarnerat pillugu inatsimmi taamatullu paasitinneqarsinnaatitaaneq pillugu inatsimmi taaneqartut ingerlatseqatigiiffiup, suliffeqarfiup, peqatigiiffiup il.il., suliassat suliarineqartarnerat pillugu inatsisip aamma paasitinneqarsinnaatitaaneq pillugu inatsisip malittarisassartaannut ilanngunneqarnissaannut inatsisini eqqartorneqartuni taakkunani marlunni taaneqartut tassaapput oqartussaaffiup sulinerani aningaasartuutit Namminersorlutik Oqartussanit imaluunniit kommunimit annertunerusutigut matussuserneqassasut imaluunniit oqartussaaffiup inatsisikkut imaluunniit inatsit naapertorlugu Namminersorlutik Oqartussat sinnerlugit imaluunniit kommuni sinnerlugu aalajangiinissaminut pisinnaatitaaffilerneqarsimaneratut annertutigisumik tamanna atuutissasoq.

Naalackersuisut piginnaatitsissut taanna maannamut A/S Inissiaatileqatigiiffimmuut INI-mut atorsimavaat, tamannalu Namminersornerullutik Oqartussat nalunaarutaatigut nr. 37-kkut 19. december 1996-imeersukkut pivoq.

Nalunaarut, soorlu tamanna Ombudsmandip 1997-imi ukiumoortumik nalunaarutaanit ersertoq, Ombudsmandip ingerlatseqatigiiffinnut suliassanik, suliassat pisortat oqartussaasut

ingerlatsinerannut inatsiseqartitsinermit taamatullu inuit ataasiakkaat pillugit inatsiseqartitsinermit tunngasut pissuseqataannik, isumaginnittunut tunngasumik pisinnaatitaanerata annertussusia pillugu qularutiginninnernut nalornissuteqarnernullu pissutaasarsimavoq, taamatuttaarlu soorlu ingerlatseqatigiiffimmik pilersitsineq pillugu inat-simmit erseqqissumik ersinngitsoq, ingerlatseqatigiiffik suliassaqrarfinni suni Kalaallit Nu-naanni Namminersornerullutik Oqartussat (massakkut Kalaallit Nunaanni Namminersorlulik Oqartussat) sinnerlugit imaluunnit kommuni sinnerlugu aalajangiinissaminut piginnaatinneqarnersoq.

Ombudsmandi ingerlatseqatigiiffimmik tassungalu oqartussaataitaalluni pisortaqrarimmik oqaloqatiginnereernerit kingornatigut ingerlatseqatigiiffiup suliasaanik aalajangersimasumik naliliineq tunngavigalugu pisinnaatitaanini pisariaqartutigut killilerpaa, tamannalu Ombudsmandip nalunaarummi amigaatinik Inatsisartunut Naalakkersuisunullu 1997-imi decemberip qaammataani nalunaarutiginninneranik nassataqarsimavoq.

Inatsisissatut siunnersuutip kingunerissavaa Ombudsmandi pisuni ataasiakkaani tamani, oqartussaaffik allaffissornikkut aalajangerneq malillugu ingerlatsinermit inatsiseqartitsinermit ilanngunneqaraangat, pisariaqartitsinermit annertutigisumik pisinnaatitaanerminik oqartussaaffimmuut naleqqiussilluni killiliisariaqassasoq. Naatsorsuutigineqarpoq oqartussaaffik pineqartoq suleqatigalugu taamatut killissaliisoqartarumaartoq.

Inatsisartut tipsernermit lottornermillu iluanaarutinit agguaassisarneq pillugu Inatsisartut inatsisaanni nr. 13-imi, 11. november 2000-imeersumi taamani atuuttumi (massakkut aningaasanoorutit ilaannit iluanaarutinit agguaassisarneq pillugu Inatsisartut Inatsisaanni nr. 10-mi, 22. november 2011-meersumi § 7) § 2-kkut aalajangersarsimavaat aningaasat taakku Kalaallit Nunaanni Timersoqatigiit Kattuffiata aamma Team Greenlandip agguaatissagaat. Aalajangersagaq taanna piareersarlugu sulianit erserpoq taanna Naalakkersuisut suliassat suliarineqartarnerat pillugu inatsit tunngavigalugu suliniaqatigiiffinnut taakkununga marlunnut atuuttussanngortissinnaagaat. Tamanna suli pisimangilaq, suliniaqatigiiffiillu taakku marluk eqqarsaatigalugit pisinnaatitaasinnaanini pillugu apeqqummut Ombudsmandi suli saqqummiussiffigineqarsimangilaq.

Tamatuma saniatigut pineqartoq tassaasimavoq Inatsisartut takornariartitsisarnermik inuussutissarsiuteqarnerup aamma nunami inuussutissarsiutit siuarsarneqarnissaat pillugit Inatsisartut inatsisaata allanngortinneqarnera pillugu Inatsisartut inatsisaatigut nr. 10-kkut, 14. november 2004-meersukkut aalajangersaasimasut suliassat suliarineqartarnerat pillugu inatsit aqutsinermit ingerlatseqatigiiffimmuut namminersortumut taamaattumut atuutissasoq.

Ingerlatseqatigiiffik taamaattoq eqqarsaatigalugu Ombudsmandip pisinnaatitaaneranik apeqqut Ombudsmandimut aalajangiiffigisassatut suli saqqummersimangilaq.

Aammattaaq ilinniagaqarnersiutit pillugit Inatsisartut inatsisaanni nr. 12-imi, 22. november 2011-meersumi tunngavissaliisimapput ilinniagaqarnersiutit pillugit malittarisassanik aqutsinermik suliffeqarfimmut namminersortumut Naalakkersuisut isumagisassanngortitsisinnaasut.

Inatsisissatut siunnersuut pillugu oqaaseqaatinit erserpoq taamatut isumagisassanngortitsinermi suliffeqarfik namminersortoq taanna suliassat suliarineqartarnerat pillugu inatsimmi pineqartunut ilaatinneqassasoq.

Suliffeqarfik namminersortoq taamaattoq eqqarsaatigalugu Ombudsmandip pisinnaatitaanerani apeqqummik Ombudsmandi aamma saqqummiussiffigineqarsimanngilaq.

Oqartussaaffimmut ingerlatsinermi inatsiseqartitsinerup malittarisassartaanut ilanngunneqartumut tunngasumik Ombudsmandip pisinnaatitaanerani killissaliineq Ombudsmandip aalajangiisartunut, ataatsimiititalianut, il.il., tunngasumik pisinnaatitaanerminik killiliineranit allaassuteqangaarnerunissaa ilimagineqanngilaq, tamatumani siunnersuummi § 7, imm. 2 takuuk.

Tamanna ilaatigut ima nassataqarpoq, tassalu Ombudsmandi, oqartussaaffiup pineqartup allaffissornikkut ingerlataanik, aaqqissuussaanikkut inissisimaffianik, oqartussaaffiup oqartussaasutut qulliuernerusutut naammagittaalliorfiusinnaanermini periaasianik il.il., pisuni ataasiakkaani naliliisarumaartoq, oqartussaaffiup Ombudsmandip pisinnaatitaaneranut ilanngunneqarnissaa pillugu aalajangiinissaq siunertaralugu.

§ 8 pillugu

Aalajangersagaq taanna naalakkersuinermit inatsiseqartitsinermi tunngaviusuni sumiiffimmi namminersorluni aqutsinerup ataqqineqarnissaanik tunngaveqarnermut ersiutaavoq.

Aalajangersagaq pingaartumik ima kinguneqarpoq, tassalu Ombudsmandip kommunimi missingersuusiornissamut pissaaneqarneq ataqqissagaa, kommunalbestyrelsilu inatsisip atuuttup killissarititaasa iluanni isumalluutininik agguataarisussaasoq tunngaviutissagaa.

Aammattaaq aalajangersakkap manna nassataraa, tassalu kommunimi naliliinikkut aalajangiinerit pineqartillugit, inatsisip atuuttup killissarititaasa iluanni sumiiffimmi politikikkut nalilersuinerit tamatumalu nassatarisaanik kommunit akornanni assigiinngissuteqarsinnaanerit Ombudsmandip ataqqissagai.

§ 9 pillugu

Aalajangersagaq Ombudsmandip naliliinermini tunngavigisaani killissaliinernik imaqarpoq.

Aalajangersagaq inatsisitigut pissusiusunik atuuttunik erseqqinnerulersitsinissamik siunertaqarpoq, taanna malillugu ilagiinni siulersorneqarnikkut pissusiusut allaffissornikkut sulinertut, Ombudsmandip nakkutilliineranut ilaatinneqartutut isigisariaqarlutik, akerlianilli ilagiit nalunaajaanerminnut tunngavigisaat upperisamillu ajoqersuuteqarnerat Ombudsmandip nakkutilliineranut ilanngunneqarsinnaanngitsut, tassami ilagiit sulinerisa ilaannut tassunga malittarisassat naalakkersugaanermut inatsiseqartitsinikkut Tunngaviusumik Inatsimmi § 4-mit aquunneqarmata, inatsisiliortullu Tunngaviusumik Inatsimmi § 66 naapertorlugu pisinnaatitaanerannut ilaatinneqaratik.

§ 10 pillugu

Imm. 1 pillugu

Aalajangersarneqarpoq nalunaarut Inatsisartut ukiakkut ataatsimiineranni suliarisassanngorlugu Inatsisartunut tunniunneqartassasoq.

Ombudsmandip ukiumoortumik nalunaarut Inatsisinut Ataatsimiititaliamut tunniuttassagaa tunngavigineqarpoq. Ukiumoortumik nalunaarutip Inatsisartuni qanoq iliorluni suliarineqartarnissaa Inatsisartut namminneq aalajangigassaraat.

Ukiumoortumik nalunaarutit Inatsisartut Inatsisinut Ataatsimiititaliaata aalangiiffigisassatut siunnersuutitut saqqummiussaa aqqutigalugu ukiuni kingullerni isummerfigineqartarsimapput.

Ombudsmandip inatsisikkut aalajangersagaasumik paasissutissiissusaatitaaneq nalunaarutitik tamanut saqqummiunneqarsimasunik Ombudsmandip nittartakkaminut www.om-budsmand.gl-imut ilanngussisarnermigut tapertalertarpaa. Aammattaaq Ombudsmandip, Inatsisartut Inatsisinut Ataatsimiititaliaat isumaqatigiissuteqarfigereerlugu, suliat Ombudsmandip ukiumoortumik nalunaarummut ilanngutissamaagai, nittartakkamut ukioq nalunaarusiorfiusoq 2009 aallarnerfigalugu ilanngunneqartalissasut aalajangerpaa.

Imm. 2 pillugu

Aalajangersagaq taanna naapertuilluartumik eqqartuussineq, “fair trial”, pillugu tunngavinnut nalinginnaasunut naapertuuttutut isigisariaqarpoq.

§ 11 pillugu

Naatsorsuutigineqarpoq Ombudsmandip inatsisini atuuttuni erseqqarlunnernik amigaatinillu naliliinernut, oqaatsimut inatsisitigut inissisimanermi innarlitsaalineqarnissamik qular-naallisitsinermik taaneqartartumut ilaasunut, aammalu inatsisinik akuersissutigineqarsimasunik allaffissornikkullu aalajangersakkanik politikikkut

naliliinernik tunngaveqanngitsunut, atassuteqartumik nalunaaruteqartarnermi maannamut periaaserisimasani attatiinnassagaa.

Ombudsmandip Inatsisartunik nakkutilliisussaanginnerata malitsigisaanik Inatsisartut pissutsimut isummereersimappata Ombudsmandi aalajangersagaq taanna malillugu nalunaaruteqarsinnaangilaq.

Naalagaaffiit Peqatigiit naalliutsitsisarneq allatullu peqqarniingartumik, inuppalaanngitsumik imaluunniit nikanarsaataasumik pinnittarneq imaluunniit pillaasarneq akiorniarlugit isumaqatigiissutaannut ilassut nammineq piumasuseq malillugu ilannguffigineqarsinnaasoq tunngavigalugu Ombudsmandip nuna tamakkerlugu pinaveersaartitsisutut inatsisit pioreersut imaluunniit inatsisissatut siunnersuutit pillugit oqaaseqaatinik saqqummiussinissaminut periarfissaa eqqarsaatigalugu inatsisissatut siunnersuummi § 17 pillugu oqaaseqaatit innersuussutigineqarput. Nalunaarutigisassat nalinginnaasumik Inatsisartut Inatsisinut Ataatsimiititaliaannut kiisalu Naalakkersuisunut nalunaarutigineqartarput.

Malittarisassani amigaatit, assersuutitut Ombudsmandimit nalunaarutigineqarsinnaasussat, suussutsimikkut imatut oqaatigineqarsinnaapput:

- Malittarisassap kalaallisut qallunaatullu oqaasertaanni naapertuutinngitsoqarnera.
- Malittarisassap atuuffigisassaa pillugu erseqqarluttoqarnera.
- Allaffissornermi aqutsinikkut malittarisassap inatsisikkut tunngavissaqannginnera imaluunniit inatsisikkut tunngavissaqarnerata nalorninarloqarnera.
- Allaffissornermi aqutsinikkut malittarisassat marluk imaluunniit inatsimmi malittarisassat marluk akornanni naapertuutinnginnerit.
- Namminersorlutik Oqartussat inatsisiliiata ataatsimullu malittarisassat, Namminersorlutik Oqartussat malissallugit pisussaaffigisaasa, matumani namminersorneq pillugu inatsit, Tunngaviusumik Inatsit aamma Inuit Pisinnaatitaaffii pillugit Europami Isumaqatigiissut ilanngullugit eqqarsaatigalugit, akornanni naapertuutinngitsoqarnera.
- Oqartussaasup qulliunerusup naammagittaalliorfiusinnaasup suunerata erseqqarlunna.
- Periaaseq inatsisikkut tunngaveqanngitsoq.

§ 12 pillugu

Imm. 1 pillugu

Kialuunniit Ombudsmandimut naammagittaalliorsinnaaneranik aalajangersakkap manna nassataraa, tassalu assersuutigalugu naammagittaallioortup nammineersinnaassuseqarnera, qallunaatut innuttaassuseqarnera imaluunniit Kalaallit Nunaanni najugaqarnera pillugit piumasaaqateqartoqarsinnaangitsoq.

Naammagittaallioortup suliame illua'tungiusutut inissisimane imaluunniit inatsisinut tunngasumik suliame soqutigisaqarnera aallaavittut piumasagaataangilaq. Taamaattorli Ombudsmandip suliame, inuit ataasiakkaat namminneq pissuserisaannut tunngasuni, isumaqataanissaq imaluunniit naammagittaalliuut inummit naammagittaallioortumit allaanerumit saqqummiunneqarsimappat, naammagittaallioortumit piginnaatitsissuteqarnissaq piumasarisarpara. Tamatumuunakkut Ombudsmandip qulakkiissavaa suliame illua'tungiusoq Ombudsmandip suliame suliaraqarnermi ilaatut suliame illua'tungiusup inuinnartut pissusaanut tunngasut, ombudsmandip oqaaseqaataani issuarneqarsinnaasussat, pillugit paasissutissanik paasiniaaneranut isumaqataasoq.

Taamaattorli Ombudsmandip naammagittaallioortut annertuumik imaluunniit naleqquttumik inatsisinut tunngasumik suliame soqutiginninnermik takutitsinngitsut itigartissinnaasarumaarpai, aamma tak. inatsisissatut siunnersuummi § 14, imm. 1 pillugu oqaaseqaatit.

Oqartussaasut allat pillugit oqartussaasut naammagittaalliuutaat Ombudsmandimit aallaavittut suliareneqartassanngillat. Kisiannili, soorlumi Ombudsmandip 1996-imi ukiumoortumik nalunaarutaata kalaallisuuani quppernermit 27-mit qallunaatuuanilu quppernermit 21-mit tamanna ersertoq, pisortanit oqartussaasunit pisortat oqartussaasut allat pillugit naammagittaalliuutip suliarinissaanut pinnaatitaasutut Ombudsmandi imminut isigivoq, tassami naammagittaallioortoq suliame aalajangersimasumi tassani suliame illua'tungiusumut inuinnartut isigisariaqarmat.

Ombudsmandi Inatsisartunit Inatsisartulluunniit ataatsimiititaliaannit naammagittaalliummik suliaraqarnissaminut pissusaaffeqaangilaq, tamannami Ombudsmandip Inatsisartunit attuumassuteqaangitsuunerata kingunerimmagu, Ombudsmandilu Inatsisartunit taakkulu ataanni oqartussaasunit peqqusissuteqarfigineqarsinnaanani.

Imm. 1-imi oqaaseqatigiit aappaanni aalajangersakkap inuit tarnikkut nappaateqarnermut tunngasut pillugit inatsiseqartitsineq naapertorlugu allaffissornikkut kiffaangissusiiagaasut taamatullu inuit, pinerluttulerineq pillugu inatsiseqartitsineq naapertorlugu misissuinerup imaluunniit pinerluttulerineq pillugu inatsiseqartitsineq naapertorlugu oqartussaasut kiffaangissusiiagaasunit misiliisuutitaqartitsiviunngitsumik pineqaatissiinerup ilaatut kiffaangissusiiagaasut Ombudsmandimut naammagittaalliorsinnaanerannik qulakkeerussinissaq siunertaraa.

Tamanna Inatsisartut Ombudsmandiat eqqarsaatigalugu ima nassataqassaaq, tassalu aamma inuit kiffaangissusiiagaasimasut Kalaallit Nunaanni imaluunniit Qallunaat Nunaanni najugallit Namminersorlutik Oqartussat kommunillu pillugit naammagittaalliorsinnaasassasut, oqartussaasumit kiffaangissusiiagaasumit killilersorneqarnatik.

Inatsisartut Ombudsmandiannut saaffiginnissuteqarnerni malunnaarsaarnermik Folketingip Ombudsmandianut saaffiginnissuteqarnerni atuuttup assinganik kiffaanngissusiiakkat atugaqartinnissaat aalajangersakkami siunertaavoq.

Taamaattorli aalajangersakkap immikkoortua, eqqartuussisarneq pillugu inatsimmut tunngassutilik, aammalu inunnt kiffaanngissusiiagaasunut angerlarsimaffimmi Inatsisartut Ombudsmandiata § 7 naapertorlugu pisinnaatitaaneranut ilaanngitsumi najugalinnut tunngassuteqartoq naalagaaffimmi oqartussaasunut isumaqatigiinniutigineqaqqaartussaavoq.

Justitsministereqarfiup allakkani 8. marts 2001-imeersuni Inatsisartut nalunaarfigai aalajangersagaq taanna ministerip oqaaseqaatissaqarfiginngikkaa.

Imm. 2 pillugu

Aalajangersakkap taassuma manna nassataraa, tassalu erseqqissarneqassasoq naammagittaalliuutit kinaassutsimik isertuisut naammagittaalliuutillu najugaqarfigisamik, Ombudsmandip suliamik suliaqarnera pillugu nalunaarutinik nassitsiffigisinnaasamik taasaqarfiunngitsut Ombudsmandimit suliarineqarsinnaagajunngitsut.

Aamma pineqartoq tassaavoq Ombudsmandip sulinermini inatsiseqartitsinikkut isumannaatsuutitsineq eqqarsaatigalugu piumasaqaatigisimagaa naammagittaalliuutit e-mailikkut nassiunneqartut, scannikkamik atsiorneqanngitsut, nassiusisup allakkatigut imaluunniit telefaxikkut malitseqartitsivigisassagai, nassitsisullu kinaassusia tassuuna uppernarsarlugu. Periaatsip taassuma atorneqarnerata ingerlaqqinnissaa naatsorsuutigineqarpoq.

Imm. 3 pillugu

Naammagittaalliornissamut piffissaliussaq ukiumik ataatsimik sivisussusilik taamatorluinnaq paasineqassaaq, tassalu piffissaliussamik saneqqutsinissamut inatsisitigut tunngavissaqanngitsoq. Taamaattumik Ombudsmandip naammagittaalliuut kingusinnerpaamik pissutsit naammagittaalliuutigineqartut pisimanerannit ukiup ataasinngornerani tigoreersimasussaavaa.

Naammagittaalliornissamut piffissaliussap aallartiffissaa sanioqqutassaangilluinnartutut paasineqassaaq, tassalu naammagittaalliornissamut piffissaliussaq ullormit suliami inaarutaasumik aalajangiiffiusumit ingerlalersussatut naatsorsuutigineqartoq.

Naammagittaalliornissamut piffissaliussap naaneranik saneqqutsinnginnissamik paasinninnermut tunngavilersuutaasoq tassaavoq Ombudsmandip naammagittaalliuutinik Kalaallit Nunaanni nunap immikkoortuinit tamanit tiguneqartunik suliaqarnerani assigiiarnerusunngortitsinissamik pingaartitsineq. Aammattaaq oqartussaasut suliami

aalajangiisimasut eqqarsaatigineqarput, tassami oqartussaasut suliap inaarneqarsimanera naatsorsuutigisinnaasariaqarmassuk. Kiisalu naggataatigut saneqqutsinnginnissamik paasinnineq Ombudsmandip, taamaaliornissamut tunngavissaqarpat, naammagittaalliut kingusinaarluni tunniunneqarsimasoq tunngavigalugu suliasamik nammineerluni aallartisisinnaajumaarnissaanut ataneqartillugu isigineqartariaqarpoq. Aammattaaq takukkit inatsisissatut siunnersuummi § 14, imm. 1 pillugu oqaaseqaatit.

Imm. 4 pillugu

Aalajangersakkakut erseqqissarneqarpoq aqutsinermi allaffissornikkut oqartussaasup qullerpaap isummernissaa Ombudsmandip suliniutigisimappagu naammagittaalliornissamut piffissaliusseq ukiumik ataatsimik sivisussusilik imm. 3-kkut aalajangersarneqarsimasoq Ombudsmandip sivitsorsinnaagaa.

Erseqqissaanermi pisut Ombudsmandip naammagittaalliummik suliarinninneranut § 13-ip toqqaannartumik akornutaanngiffii Ombudsmandilli § 14 tunngavigalugu suliamik suliarinninnginnermini suliap allaffissornikkut aqutsinermi oqartussaasumit suliarineqartariaqartutut isumaqarfigisai pineqarput.

Tamanna assersuutigalugu pisariaqarsinnaavoq Ombudsmandi isumaqarpat suliaq kommuninik nakkutilliinermi oqartussaasumut nalinginnaasumut saqqummiunneqartariaqartoq, imaluunniit Namminersorlutik Oqartussani oqartussaasumit ingerlatsiveqarfimmik pineqartumik nakkutilliinissamut piginnaatitaasumut saqqummiunneqartariaqartoq.

Naammagittaalliut nutaaq aalajangiinerup naammagittaalliutigeqqaarneqartup kingorna ukiumik ataatsimik piffissaliussap naannginnerani suliarineqarsinnaanngitsoq pissutsit ilimanarsisippassuk Ombudsmandip naammagittaalliortoq pisuni taamaattuni nalunaarfigisinnaavaa aalajangiineq naammagittaalliutigeqqaarneqartoq pillugu naammagittaalliut nutaaq piffissaagallartillugu tunniunneqartutut isigineqassasoq, naammagittaalliut suliat ataasiakkaarlugit sivikinnerusumik piffissaliussatut nalunaarutigineqartup iluani tiguneqarpat.

§ 13 pillugu

Aalajangersagaq tunngaviusumik isummamut imaattumut ersiutaavoq, tassalu ingerlatsiviup innuttaasullu akornanni saqitsaassutit illua'tungeriit akunnerminni aaqinniartariaqaraat, nakkutilliisutut oqartussaasup avataaneersup Inatsisartut Ombudsmandiattut ittup suliamut akuliutitinneqannginnerani.

Ombudsmandip periaaseraa pissutsit allat pillugit naammagittaalliutit, taakkunani oqartussaasumut qulliunerusumut naammagittaalliorsinnaaneq atorneqarsimanngikkaangat,

aalajangiinerit pillugit naammagittaalliuutit assigalugit oqartussaasumut qulliunerusumut naammagittaalliorfiusinnaasumut nassiunneqassasut, tassani isummerfigineqarnissaat siunertarlugu. Periaasiusoq unaavoq, Ombudsmandip naammagittaalliortoq oqartussaasup qulliunerusup suliamik isummerfiginninnissaanik utaqqimaqqusarlugu, naammagittaalliortup naammagittaalliumminik Ombudsmandimut saqqummiussinnginnerani.

Taamaattumik aalajangiinerit pillugit naammagittaalliuutit aamma pissutsit allat pillugit naammagittaalliuutit akornanni immikkoortitsisarnerup ingerlateqqinneqannginnera Ombudsmandip naammagittaalliummik suliarinnilnginnerani allaffissorinngikkut aqutsinermi oqartussaasunut qulliunerusunut naammagittaalliornissamut periarfissat tamarmik tamatigut atorpeqarsimanissaannik tunngavimmik allaaserineqartumik qulakkeerinnittuussaq.

Ombudsmandip innuttaasut inatsimmi naammagittaalliornissamut piffissaliunneqartup iluani oqartussaasumut qulliunerusumut naammagittaalliornissamut periarfissanik atueqqaarnatik Ombudsmandimut naammagittaalliortut naammagittaalliuutaasa suliarineqarnissaat (aamma) itigartitsissutigisarpaa. Periaatsip taassuma manna allaavigaa, tassalu innuttaasoq allaffissornermi aqutsinikkut naammagittaalliornissamut periarfissamut taarsiullugu Ombudsmandimut naammagittaalliornissamik toqqaasinnaasariaqanngitsoq.

Ombudsmandimut naammagittaalliornissamut piffissaliussaq ukiumik ataatsimik sivisussusilik, tak. inatsisissatut siunnersuummi § 12, imm. 3, aatsaat piffissamit, pisup naammagittaalliuutigineqartup oqartussaasumit qullerpaamit aalajangiiffigineqarnerata kingornatigut aallartittutut naatsorsorneqalersarpoq.

Taamaalilluni piffissaliussap qaangerneqarnera pissutigalugu itigartitsineq, tak, inatsisissatut siunnersuummi § 12, imm. 3, oqartussamut qulliunerusumut naammagittaalliornissamut periarfissamik atuisimannginneq pissutigalugu itigartitsinermut sanilliullugu periarfissatut kinngullertut inissisimavoq.

Taamaattorli Ombudsmandip, tak. inatsisissatut siunnersuummi § 15, imm. 1, suliaq nammineerluni suliarilersinnaavaa, allaffissorinngikkut oqartussaasumut qulliunerusumut inatsisitigut aalajangersagaanngitsumik naammagittaalliorfiusinnaasumut naammagittaalliorsinnaatitaaneq imaluunniit naammagittaalliorsinnaatitaaneq inatsisitigut aalajangersagaasoq atorpeqarsimanngikkaluarpataluunniit.

§ 14 pillugu

Imm. 1 pillugu

Aalajangersakkakkut Ombudsmandi, naak naammagittaalliuut piffissaq eqqorlugu naammagittaalliuutigineqarsimagaluartoq, oqartussaasumut qulliunerusumut naammagittaalliorsinnaaneq atorpeqarsimagaluartoq naammagittaalliuullu pissutsinut,

Ombudsmandip pisinnaatitaaneranut atagaluartoq, naammagittaalliutit suliarinissaata itigartitsissutiginiisaanut periarfissinneqarpoq.

Aalajangersagaq taanna manna tikillugu suliat itigartitsissutiginiisaannut suliallu suliarineqarnissaminnut naleqquttunngorsarnissaannut atorneqarsinnaavoq, taamaaliornikkut naammagittaalliutit immikkoortuisa ilaannai aalajangersimasumik misissuiffigineqassallutik. Aalajangersagaq taanna suliat makku suliarineqarnissaasa itigartitsissutigineqarnissaannut atorneqartarsimavoq:

- suulluannngitsut pillugit naammagittaalliutit,
- pissutsit inuit ataasiakkaat pillugit inatsiseqartitsinermit malittarisassanut sanilliussilluni pisortat suliffiutaannik naliliinissamik piumasaqaateqarfiusut pillugit naammagittaalliutit,
- naammagittaalliutit misissuinissamut nukissanik naleqqutinngitsumik amerlasuunik piumasaqaateqarfiusut,
- naammagittaalliutit Ombudsmandip naalakkersuisunikkut siunertaqartutut naliliiffigisai aamma
- naammagittaalliutit, assersuutigalugu pissutsinik uppersaasarsuineranut tunngasunik pissuteqarluni eqqartuussivinnit aalajangiivigineqarnissaat pissusissamisoornerusut.

Kiisalu aalajangersagaq sulianik, Ombudsmandip nammineerluni suliniutitut suliarinissaat naleqquttuunerpaasutut isumaqarfigisaanik itigartitsissuteqarnermut atorneqartarsimavoq, oqartussaasuni taakkuusuni pissutsit assigiiaartut pillugit naammagittaalliutit arlalinnik naammagittaalliuteqartoqartarsimanera pissutigajunnerullugu.

Naammagittaalliutit, Ombudsmandip suliarineqarnissaminnut allatigut naammassinnittunik, itigartitsissuteqarnissamut Ombudsmandip piginnaatinneqarnerata Ombudsmandip siunertarisamut naleqqunnerpaasorinninneratut atuinneqarsinnaasariaqarpoq.

Imm. 2 pillugu

Naammagittaalliutit suliarineqarnissaa itigartitsissutigiguniuk sumut naammagittaalliortoqarsinnaanera Ombudsmandip sapinngisamik ilitsersuutigissavaa.

§ 15-imut

Imm. 1 pillugu

Periaatsimi suliaasat nammineerluni suliarineqalersarput suliaasap pissutsinik tunngavissaanerusunik tunngaveqaraangat, imaluunniit suliaasap paasissutissat pigineqartut tunngavigalugit kukkunernik annertuunik pingaarutilinnillu imaqarsinnaanera

tunngavigalugu. Tamatumunnga pissutaasinnaavoq suliap tusagassiuutini eqqartorneqarnera, naammagittaalliuutip kingusinaarluni tunniunneqarsimanera imaluunniit naammagittaalliuutit imarisamikku imaluunniit imarisaasa immikkoortuisa ilaasa tamanut tunngasumik immikkut misissuiffigineqarnissaminnut piukkunnarnerpaanerat.

Imm. 2 pillugu

Aalajangersagaq Ombudsmandip nammineerluni suliniutinik, oqartussaasumi suliassanik arlalinnik ilalinnik imaluunniit oqartussaasuni arlalinni suliassanik pissuseqatigiinnik, aallartitsinissaanut periarfissiivoq.

§ 16 pillugu

Ombudsmandi suliffeqarfinnik il.il. misissuinermini - apeqqutit inatsiseqartitsinermut tunnganerusut pillugit naliliinermi saniatigut - suliffeqarfiup/paaqqinniffiup sullitaasa inuttut timikkut tarnikkullu ikiuineq eqqarsaatigalugu atugaat pillugit aamma naliliisarpoq. Ombudsmandip tamatumunnga atatillugu naliliinera innuttaasut inatsiseqartitsinikkut innarlitsaalineqarnissaannik, mianerineqarnissaannik inuppalaartumillu pineqarnissaannik piumasqaateqarnermit sunnerneqarsimassaaq. Ombudsmandip naliliinera assersuutigalugu illutat allanngortinneqarnissaat, pitsaanerusumik aserfallatsaalineqarnissaat imaluunniit sunngiffimmi sammisassaqartitsinermilu pitsaanerusunik suliniuteqartoqarnissaa pillugit inassuteqaatitut saqqummersinnaavoq.

Aalajangersagaq Ombudsmandip kommuniq allaffiinik, suliffeqarfinnik atuartitsiviusunik, isumaginninnermi paaqqinniffinnik pisortallu allaffeqarfiinik il.il. assersuutigalugu Folкетинip Ombudsmandiata pisinnaatitaaneranut pisinnaatitaalluni misissuivissinnaatitaaneranut inatsisikkut tunngavissaliivoq. Misissuiartorluni takusaanerit taamaattut Ombudsmandip naliliinera tunngavigalugu immikkut suliniuteqarnertut imaluunniit allatigut illoqarfinnut nunaqarfinnulluunniit tikeraarneranut atatillugu ingerlanneqarsinnaapput.

Ombudsmandip suliffeqarfimmi takusaanini tunngavigalugu suliffeqarfimmik taassuminnga misissuinerani torersuutitsinissamik malittarisassat allassimasut suliffeqarfimmut pineqartunut imaluunniit suliffeqarfiup sullitai eqqarsaatigalugit atuuttut ilaatinneqarsinnaapput.

Suliamik paasissutissiinerup ilaatut Ombudsmandip suliffeqarfinnik takusaanera pillugu oqaaseqaatini § 18, imm. 4 innersuussutigineqarpoq.

§ 17 pillugu

Aalajangersakkap taassuma erseqqissarpaa Naalagaaffiit Peqatigiit naalluutitsisarneq allatullu

peqqarniingartumik, inuppalaanngitsumik imaluunniit nikanarsaataasumik pinnittarneq imaluunniit pillaasarneq akiorniarlugit isumaqatigiissutaannut ilassut 18. december 2002-meersoq nammineq piumassuseq malillugu ilannguffigineqarsinnaasoq tunngavigalugu nuna tamakkerlugu pinaveersaartitsisut suliaasaq Ombudsmandip sulineranut ilaasoq.

Suliaasap annertussusia isumaqatigiissummut ilassummi nammineq piumassuseq malillugu ilannguffigineqarsinnaasumi artikelini 17-imit 23-mut aamma artikelimi 35 imaattunik oqaasertaqartuni erseqqinnerusumik allaaserineqarsimavoq:

"[...]

Artikel 17

Naalagaaffiup peqataasup suulluunniit isumaqatigiissummut ilassutip matuma atortuulernerata imaluunniit atortuulersinneqarnerata akuerineqarnerataluunniit kingornatigut kingusinnerpaamik ukioq ataaseq qaangiutsinnagu naalliutitsisarneq pinaveersaartinniarlugu nuna tamakkerlugu pinaveersaartitsisoq ataaseq arlallilluunniit atatissavai, toqqassavai pilersissallugilluunniit. Pinaveersaartitsisut qitiunngitsumi inissisimasunit toqqagaasut nuna tamakkerlugu pinaveersaartitsisut toqqarneqarsinnaapput, isumaqatigiissummut ilassut manna siunertarlugu, taakku isumaqatigiissummut ilassummi aalajangersakkanut naapertuuttuuppata.

Artikel 18

1. Nuna tamakkerlugu pinaveersaartitsisut sulinerminni arlaannaannulluunniit attuumassuteqannginnerat sulisuisalu arlaannaannulluunniit attuumassuteqannginnerat naalagaaffiit peqataasut uppersassavaat.
2. Nuna tamakkerlugu pinaveersaartitsinermi immikkut ilisimasallit suliatigut pisariaqarneratut pininnaasaqarnissaat ilisimasaqarnissaallu qulakkeerniarlugu pisariaqartumik iliuuserineqartussat naalagaaffiit peqataasut isumagissavaat. Angutit arnallu amerlaqatigiissinniarneqassapput, nunallu inoqqaavisa nunamilu ikinnerussuteqartut naammaginatumik sinnisoqartinneqarnissaat anguniarneqassalluni.
3. Nuna tamakkerlugu pinaveersaartitsisut sulisinnaaqullugit pisariaqartitaannik atugassikkumallugit naalagaaffiit peqataasut imminnut pisussaattipput.
4. Nuna tamakkerlugu pinaveersaartitsisunik pilersitsinermi nunami pineqartumi inuit pininnaatitaaffii pillugit suliniaqatigiiffiit inissisimanerat naalagaaffiit peqataasut pisariaqarneratut mianerissavaat.

Artikel 19

Nuna tamakkerlugu pinaveersaartitsisut annikinnerpaaffiatigut makkuninnga pininnaatitaassapput:

- a) inuit kiffaanngissusiagaasimasut tigummineqarfiini, tak. artikel 4-mi nassuiaat, pinninnerup akuttunngitsumik misissortarnissaanut, naalliutsitsinermut peqqarniingartumillu inuppalaanngitsumik imaluunniit nikanarsaataasumik pineqarnermut pillarneqarnermulluunniit illersorneqarnerisa nukittorsarneqarnissaat siunertarlugu;
- b) oqartussaasunut susasaqartunut kaammattuutunik saqqummiussinissaminnut, inuit kiffaanngissusiagaasimasut pineqarnerisa atugaasalu pitsaanerulersinneqarnissaat siunertarlugu aamma Naalagaaffiit Peqatigiit aalajangersagaat pineqartut isiginiarlugit naalliutsitsineq allatullu peqqarniingartumik, inuppalaanngitsumik imaluunniit nikanarsaataasumik pinninneq imaluunniit pillaaneq pinaveersimatinniarlugit;
- c) inatsisaareersut inatsisissatulluunniit siunnersuutit pillugit siunnersuutitik oqaaseqaatinillu saqqummiussinissaminnut.

Artikel 20

Nuna tamakkerlugu pinaveersaartitsisut piginnaatitaanerminnik naammassinninnissaat anguniarlugu naalagaaffiit isumaqatigiissummut ilassummi peqataasut imaaliornissamut imminnut pisussaattipput:

- a) tigumminniffinni, tak. artikel 4-mi nassuiaat, inuit kiffaanngissusiagaasimasut amerlassusiat kiisalu tigumminniffiit amerlassusii sumiiffiillu pillugit paasissutissanik tamanik tunniussinissamut;
- b) inuit taamaattut pineqarnerat kiisalu kiffaanngissusiagaanerminni atugaat pillugit paasissutissanik tamanik tunniussinissaminut;
- c) tigumminniffinnut taakkulu illuutaannut atortulersuutaannullu tamanut isersinnaatitsinissaminut;
- d) inuit kiffaanngissusiagaasimasut kiisalu inuit kikkulluunniit paasissutissanik pisariaqartinneqartunik tunniussinissaasutut nuna tamakkerlugu pinaveersaartitsisup isigisaanik nakkutigineqaratik ilisimannitoqaratilluunniit oqaloqatiginissaannut periarfissiinissaminut, inuk nammineq oqalutseqarluniluunniit oqaloqatigalugu, tamanna pisariaqartoq naliliisoqarpat;
- e) sumiiffinnik iserfigerusutanik inunnillu oqaloqatigerusutanik toqqaanissaannut kiffaanngissuseqartinnissaannut;
- f) pinaveersaartitsinermi komitémut attaveqarfiginnissinnaatitsinissaminut, paasissutissanik tassunga nassiussinnaatitsinissaminut taassuminngalu naapeqatiginissinnaatitsinissaminut.

Artikel 21

1. Oqartussaasup imaluunniit atorfilittap kialuunniit inuk suliniaqatigiiffilluunniit paasissutissanik nuna tamakkerlugu pinaveersaartitsisumut tunniussisimanera pissutigalugu naalliutsinneqaqqusinnaanngilaa pineqaatissinneqaqqusinnaanaguluunniit, imaluunniit tamanna akuersaarsinnaanagu akueriinnarsinnaanaguluunniit, paasissutissat eqqortuunerat eqqunngitsuuneralluunniit apeqqutaatinnagu, paasissutissanillu tunniussineq inunnut suliniaqatigiiffinnulluunniit taamaattunut ajoqutissarsiffiusumik kinguneqartinneqassanani.
2. Paasissutissat isertuunneqartussat nuna tamakkerlugu pinaveersaartitsisumit katersorneqartut nipangiussisimasussaataitaanermik aalajangersakkani pineqartunut ilaatinneqarput. Pissutsit inunnut ataasiakkaanut tunngalluinnartut pillugit paasissutissat inuk pineqartoq erseqqilluinnartumik akuersisimangippat tamanut saqqummiunneqassanngillat.

Artikel 22

Naalagaaffimmi peqataasumi oqartussaasut taamaaliornissaminut pisinnaatitaasut nuna tamakkerlugu pinaveersaartitsisup kaammattuutai suliarissavaat, naammassinninniarlunilu iliuserineqarsinnaasooq pillugu oqaloqatiginissallutik.

Artikel 23

Naalagaaffiit isumaqatigiissummut ilassummi matumani peqataasut imminnut pisussaattipput nuna tamakkerlugu pinaveersaartitsisut ukiumoortumik nalunaarusaasa tamanut saqqummiunniissaannut ilisimaneqalersinniarlugillu siammarterinissaminut.

(...)

Artikel 35

Pinaveersaartitsinermi komitémut ilaasortat aamma nuna tamakkerlugu pinaveersaartitsisut sulinermik ingerlannerani arlaannaannulluunniit atuumassuteqannginnissamik pisariaqartitsinerup annertussusia naapertorlugu pisinnaatitaaffilerneqarlutillu attorneqarsinnaanngiffilerneqassapput (immunitet). Pinaveersaartitsinermi komitémut ilaasortat Naalagaaffiit Peqatigiit pisinnaatitaaffii attorneqarsinnaanngiffiilu pillugit isumaqatigiissummi 13. februar 1946-meersumi imm. 22-mi aalajangersarneqartunik pisinnaatitaaffilerneqarlutillu attorneqarsinnaanngiffilerneqassapput,

isumaqatigiisummi tassani imm. 23 isiginiarlugu.

[...]" (Atorfeqarfimmi nutsigaavoq)

Pingaartumik suliffeqarfiit namminersortut pisortanillu ilaannakortumik pigineqartut eqqarsaatigalugit artikel 4-mi pisinnaatitaaneq, artikel 18, imm. 2-mi attuumassuteqarneq immikkullu ilisimasaqarneq inatsisilerinerup saniatigut allanik immikkut ilisimasalinnik ilanngussinissamut pisussaaffimmik nassataqarsinnaasoq, artikel 19, litra c-mi inatsisaareersut inatsisissatulluunniit siunnersuutit pillugit siunnersuuteqarsinnaaneq oqaaseqaateqarsinnaanerlu, artikel 21, imm. 1-imi inuit nuna tamakkerlugu pinaveersaartitsisumut paasissutissanik tunniussisut pineqaatissinneqarsinnaannginnerat, artikel 22-mi naammassinninniarnermi iliuuserisassat pillugit oqaloqatiginnittussaataitaaneq kiisalu artikel 35-mi nuna tamakkerlugu pinaveersaartitsisup attorneqarsinnaanngiffeqarnera Ombudsmandip sulineranut nalinginnaasumik tunngavimmik sanequtsinerummata siunnersuutigineqarpoq isumaqatigiisummut ilaasumi aalajangersakkat Ombudsmandi pillugu inatsimmi ilanngunneqassasut, suliassaq nalornissutigineqaleqqunagu.

Kapitali 3 - Ombudsmandip sulianik suliarinnittarnera

§ 18 pillugu

Malittarisassatigut atuuttutigut aalajangersarneqarpoq oqartussaasut Ombudsmandip pisinnaatitaanerani pineqartunut ilaatinneqartut pisussaaffeqartut Ombudsmandi paasissutissanik piumasaanik nalunaarfigissallugu, allagaatinik piumasaanik tunissallugu allakkatigullu oqaaseqaasioqqusippat allakkatigut oqaaseqaasiussallutik. § 18, imm. 1-ip 2-llu allannguutissaattut siunnersuutikkut paaqqinniffiit/suliffeqarfiit il.il. namminersortut Ombudsmandip sulinerani pineqartunut § 7, imm. 1-imi oqaaseqatigiit aappaanni aalajangersakkatut siunnersuutigineqartoq tunngavigalugu ilaatinneqartut paasissutissiinissamut allalagaatinillu tunniussinissamut aamma pisussaaffeqarput.

§ 18, imm. 5-imi aalajangersakkatut siunnersuutigineqartukut Ombudsmandip paaqqinniffinnut/suliffeqarfinnut il.il namminersortunut inuit kiffaangissusiagaaffigisaannut kiffaangissusiagaaffigisinnaasaannulluunniit eqqartuussivik aalajangiiteqqaanngikkaluarlugu isersinnaatitaanera inatsisikkut tunngavissalerneqarpoq, tak. § 7, imm. 1-imi oqaaseqatigiit aappaanni aalajangersagassatut siunnersuut. Misissuineramik oqarnermi ininik/sumiif-figisanik, nalunaarsuiffinnik paasissutissanillu/atortusanillu allanik misissuineq pineqarpoq.

Imm. 1 pillugu

Aalajangersagaq taanna paasissutissanik imaluunniit allagaatinik pigineqareersunik, matumuni allakkiat suliffiup iluani atugassat, allattaaviit, paasissutissat qarasaasianiittut il.il.

eqqarsaatigalugit, tunniussinermut tunngavoq.

Ombudsmandip periaasia Ombudsmandip 1996-imi ukiumoortumik nalunaarutaani allaaserineqarpoq, tassani Ombudsmandip erseqqissarsimmagu “naammagittaalliortumut tunngasumik suliami mappimik atukkiussinissamik” qinnutigisaqarnerup oqaasertaa naapertorlugu paasineqassasoq, suliamilu allagaatinik paasitinneqarsinnaatitaaneq pillugu malittarisassat kingunerisaannik killiliiffigineqassanngitsoq.

Tamatumunnga atatillugu oqaatigineqarpoq allagaatit suliami allagaatinik paasitinneqarsinnaatitaanermut qulangersimaneqarnerat pingaaruteqanngitsoq. Pappiarat atortussat suliffiup iluani pigineqartut, Ombudsmandimut tunniunneqarnermikkut suliffiup iluani atorneqartussaannermittut pissuseqarnermik annaaneq ajorpaat.

Aammattaaq Ombudsmandip erseqqissarpaa oqartussaasut suliami allagaatit sorliit nassiunneqartussatut naleqquttuunerinik nalilersuinissaminut pisinnaatitaanngitsut, qinnutigisaqarnerli suliami allagaatinut mappimik pigeqqaakkamik suliami uppersaatissanik, suliami pigineqartunik oqartussaasullu suliamik suliaqarnerannut tunngaviusunik, tamanik imalimmik atukkiussinissaq pillugu qinnutigisaqarnerut paasineqassasoq.

Aalajangersagaq Ombudsmandip suliaannik suliaqarnerani pingaaruteqartuuvoq. Ilaatigut imatut pisoqarsinnaasarpoq, Ombudsmandip suliami oqaaseqaateqarenermi kingornagut paasigaa oqartussaasut suliami allagaatinik tamanik atukkiussisimanngitsut, taamaattumillu ombudsmandip naliliinerminut tunngavigisani nalileqqittariaqaraa, immaqalu isornartorsiuinini nalileqqittariaqarlugu.

Imm. 2 pillugu

Aalajangersagaq imm. 1-imut, ombudsmandip suliami pappiaraatinik atortussanik pioreersunik piumasaqarsinnaatitaaneranik taamaallaat eqqartuisumut tapersiutaavoq. Aalajangersakkakut siunertarineqarpoq Ombudsmandip paasissutissanik paasinaasinnaatitaanermi paasissutissaannavinnik paasinaanermi uppersaatissanillu oqartussaaffiup pigisaanik pissarsiniarnermini killiliivigineqannginnissaa, aammattaarli piumasarisnaallugu oqartussaasoq periaatsimut, oqartussaasup susasaqarfimmini atortagaanut, tunngaviusutut aamma/imaluunniit tamanut tunngasumik pissuseqarnerusumut inatsisitigullu paasinnittaatsimik tunuliaqutaasumut nassuiaammik saqqummiussinissaa.

Imm. 3

Aalajangersakkap Ombudsmandi suliani, oqartussaasup paasissutissanik, Ombudsmandip piumasarisaanik tunniussiumanngiffigisaani imaluunniit suliaq ingerlatsivimmi tammarsimassagualuarpaa, inunnik eqqartuussivimmi killisiorneqartussanik aggeqqusinissaanut periarfissippaa. Taamaattorli aalajangersagaq kalaallit qallunaalluunniit Ombudsmanditut

sulineramik periaaseqarneranni atorneqanngisaannarsimavoq, taamaakkaluartorli Ombudsmandip nakkutilliinermik sunniuteqarluartumik sulinermini periarfissaanik killiliinnginnissaq pissutigalugu atatiinnarneqarnissaa siunnersuutigineqarluni.

Oqaatigineqarpoq Kalaallit Nunaanni eqqartuussisarneq pillugu inatsimmi nr. 305-imi, 30. april 2008-meersumi, 1. januar 2010-mi atuutilersumi § 707-ikkut eqqartuussisarneq pillugu inatsimmi atuuttumi kapitali 8, § 1-imi pissutsit inatsiseqartitsineranut pingaaruteqartut pillugit misissuineranut paasissutissartalersuinernullu atatillugu eqqartuussivimmi killisiuinerit pillugit aalajangersagaq ingerlateqqinneqarmat.

Imm. 4 pillugu

Aalajangersakkakut erseqqissarneqarpoq Ombudsmandip suliamut tunngasumik paasissutissartalersuinerana aammattaaq misissuiartornermut takusaanermullu atatillugu ingerlanneqarsinnaasoq.

Taamaalilluni nammineerluni misissuiartorneq § 16-imi pineqarpoq, kiisalu Ombudsmandip suliaanut tunngatillugu paasissutissartalersuineranut ataneqartillugu suliffeqarfinnik takusaaneq § 18, imm. 4-mi pineqarpoq.

Imm. 5 pillugu

Aalajangersakkap taassuma qaqutigunnaq atorneqartarnissaa naatsorsuutigineqarpoq, Naalagaaffiillu Peqatigiit naalliutitsisarneq allatullu peqqarniingaartumik, inuppalaanngitsumik imaluunniit nikanarsaataasumik pinnittarneq imaluunniit pillaaarneq akiorniarlugit isumaqatigiissutaannut ilassut tunngavigalugu suliassat suliarineqarneranni tamanna pisariaqartoq naliliisoqarpat aatsaat atorneqartassalluni.

§ 19 pillugu

Imm. 1 pillugu

Aalajangersakkap erseqqissarpaa Ombudsmandip naliliinerminut tunngavigisaa tassaasoq inatsisit atuuttut, matumani aamma ingerlatsinerimi inatsisit immikkullu inatsiseqartitsinerimi suliassat suliarineqartarnerannut malittarisassat. Tamatuma saniatigut suliassanik suliqaarneq oqartussaasut suliassanik suliqaartarnerannut oqartussallu ingerlatsinerimi ileqqorissaarnissamik maleruaanerannut tunngavigisat inatsisitigut aalajangersagaanngitsut tunngavigalugit nalilerneqartarpoq, matumani aalajangiineq naammagittaalliuutigineqartoq naleqquttuunersoq ilanngullugu eqqarsatigalugu. Kiisalu Ombudsmandip nalilertarpaa oqartussaasup malittarisassiinermini iliuuserisaminilu inuttut piginnaatitaaffinnik malinninersoq.

Ombudsmandip misissuiartorluni suliqaartarnerminut atatillugu naliliisarneranut tunngavik eqqarsaatigalugu § 16-imut innersuussisoqarpoq, tassami aalajangersakkamut tassunga

innersuussinermi erseqqissarneqarmat Ombudsmandip misissuiartornermini naliliisarnermini tunngavia atitunerummat inatsisitigut misiliisarnermut tunngavimmut, Ombudsmandip sulianik misissuisarneranut atuuttumut, naleqqiullugu.

Naalagaaffiit Peqatigiit naalliutsitsisarneq allatullu peqqarniingaartumik, inuppalaanngitsumik imaluunniit nikanarsaataasumik pinnittarneq imaluunniit pillaaarneq akiorniarlugit isumaqatigiissutaannut ilassut 18. december 2002-meersoq nammineq piumassuseq malillugu ilannguffigineqarsinnaasoq tunngavigalugu Ombudsmandip nuna tamakkerlugu pinaveersaartitsisutut sulinera eqqarsaatigalugu § 17 pillugu oqaaseqaatit innersuussutigineqarput.

Imm. 2 pillugu

Aalajangersakkakut tassuuna aalajangersarneqarpoq pisortat ingerlatsineranni suliassat suliarineqartarnerat pillugu Inatsisartut inatsisaanni tunngaviit Ombudsmandip sulinerani taamatut atuutsinneqassasut; taamaattorli allagaatinik paasitinneqarsinnaatitaaneq pillugu malittarisassat ilanngunnagit.

Aalajangersakkap manna nassataraa, tassalu Ombudsmandip (Ombudsmandillu sulisuisa) suliameq peqataasinnaassuseqannginneq (tamanna § 5-imi aalajangersakkap aamma nassataraa), ilitsersuisussaataaneq, suliameq illua'tungiusup isumaanik tusarniaasarneq tunngavilersuisarnerlu kiisalu nipangiussisimasussaataaneq (tamanna § 28-mi aalajangersakkap aamma nassataraa) pillugit tunngavinnik malinnittusaaanera. Ilitsersuisussaataanermik tunngavik Ombudsmandi eqqarsaatigalugu suliatigut sunniuteqanngilaq.

Ingerlatsineq pillugu inatsiseqartitsinermi tunngaviit inatsisitigut aalajangersagaanngitsut (matumani ass. isiginiagassanik suliameq attuumassuteqanngitsunik ilanngusseqqusaannginneq ilanngullugu eqqarsaatigalugu) naatsorsuutigineqarpoq Ombudsmandip taakku sulianik suliarinninnermini suli atortassagai, tamanna Ombudsmandip immikkut atuuttuuneranut sulineranullu attuumassuteqartoq ataneqartinneqarsinnaasorlu naliliisoqaraangat.

Tamatuma pissuseqataa ingerlatsinermi ileqqorissaarnermik tunngavinnut ingerlatsineq pillugu inatsisini taaneqanngitsunut aamma atuuppoq, matumani ilaatigut ingerlatsiviup inussiarnersuunissaanik, mianerinnittuunissaanik tatiginninnermillu pilersitsisuunissaanik piumasaqaatit kiisalu angusaqarluartarnissamik toqqissisimanartunillu periaaseqarnissamik piumasaqaatit ilanngullugit eqqarsaatigalugit.

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni tunngaviit aalajangersakkami tassani pineqartunut ilaatinneqanngillat. Taamaakkaluartoq Ombudsmandi qulaani "toqqissisimanartunik periaaseqarnissamik" piumasaqaatip

nassatarisaanik, allattuisussaatitaanermik piumasaqaammik aallaavittut malinnittussaasutut isigineqarpoq.

Ombudsmandi ingerlatsineq pillugu inatsiseqartitsinermi aalajangiinermik oqartarnermi aalajangiinertut ittunik aalajangiineq ajorpoq, taamaalillunilu aalajangersakkap saneqqunneqarnera assersuutigalugu Ombudmandip nalunaarutiginninneri, inassuteqaatai imaluunniit suliamik misissuiffiginninniarani aalajangiineri eqqarsaatigalugit atuussinnaassuseqannginnermik nassataqarsinnaasussaanani.

Aalajangersakkamik saneqqutsinerup pisortani oqartussaasoq Ombudsmandi eqqarsaatigalugu, Inatsisartut inatsisaata nassatarisaanik, soorlu paasissutissanik Ombudsmandimut nalunaaruteqarnissamut allagaatinilluunniit Ombudsmandip piumasaanik tunniussinissamut aamma pisussaaffianngilaa.

Taamaalillutik oqartussaasut naammagittaalliortulluunniit aalajangersagaq taanna tunngavigalugu Ombudsmandimut atortussaatisiniarsinnaanngillat. Aalajangersakkamilli saneqqutsineq Ombudsmandip Inatsisartullu akornanni pissutsinut sunniuteqarsinnaavoq, tamannalu ajornerpaatut kinguneqartinneqarpat Inatsisartut Ombudsmandi soraarsinnaavaat, Ombudsmandip suliassani Inatsisartunit tatigineqarunnaarutigisaminik ingerlappagit.

§ 20 pillugu

Ombudsmandip oqartussaasut pillugit, inuilli ataasiakkaat pinnagit, naammagittaalliuutit sularisarpai.

Oqartussaasorli akisussaasoq sulisumik naliliinikkut malersuinermik aallartitsinissaanik inassuteqaateqarfigissallugu Ombudsmandi mattunneqarsimassanngilaq, taamatuttaarlu pisuni immikkorluinnaq ittuni Ombudsmandi ingerlatsivimmi sulisumik politiinut unnerluutiginnissinnaasussaalluni.

Aammattaaq borgmesterit kukkussutigisaat sumiginnaanerilu kommunini ataatsimiititalianut aamma Kalaallit Nunaani Kommuninik Nakkutilliisoqarfimmut nalunaarutigisinnaasussaavai.

Inuttut akisussaatisineq atuutsinneqassanersoq misissuisoqaqqullugu Ombudsmandip inassuteqaataa Namminersorlutik Oqartussani oqartussaasumit akisussaasumit malinneqarumanngippat tamanna Ombudsmandip Inatsisartut Inatsisinut Ataatsimiititaliaannut nalunaarutigisinnaavaa, tak. inatsisissatut siunnersuummi § 23 taannalu pillugu oqaaseqaatit.

§ 21 pillugu

Imm. 1 pillugu

Aalajangersakkami erseqqissarneqarpoq oqartussaasup naammagittaalliuutigineqartup tusarniaaviginissaanut immikkullu illuinnartunik pisoqartillugu inuup naammagittaalliuutigineqartup tusarniaaviginissaanut Ombudsmandi pisussaaffeqartoq. Inuulli naammagittaalliuutigineqartup tusarniaaviginissaanut pisussaaffeqarneq pisuni immikkut illuinnartunu taamaallaat pisassasoq naatsorsuutigineqarpoq, tassami Ombudsmandip misissuineri siullertut pingaarnertullu oqartussaasunut, imaanngitsoq inunnut ataasiakkaanut, sammititaammata. Pisussaaffeqarneq taanna misissuineri, naammagittaalliuuteqartoqarneratigut sulissutigineqalersunut taamatullu sulianut, Ombudsmandip nammineerluni suliniuteqarnertut aallartitaanut atuuppoq.

Aalajangersakkakkut erseqqissarneqarpoq tassani akerliliissuteqarsinnaatitaanermut malittarisassaq pineqartoq, illua'tungeriit tamarmik immikkut illua'tungerisap oqaatigisaanik ilisimasaqalersinnaatitaanissaat taakkunungalugu oqaaseqarsinnaatitaanissaat pillugu malittarisassaq.

Ombudsmandip suliamik suliaqarnini pilertortumik misiliineq tunngavigalugu suli inaarsinnaasarumaarpaa, tassa imaappoq oqartussaasoq naammagittaalliuutigineqartoq tusarniaaviginagu, assersuutigalugu suliami allagaatinik misissuinerinnarmigut, tassalu misissuineq isornartorsiuinani inassuteqaateqaraniluunniit inaarneqassappat.

Ombudsmandip aalajangersimasumik periaaseraa oqartussaasup naammagittaalliuutigineqartup tusarniaavigineqanngitsuinnartarnera, Ombudsmandi naammagittaalliuut tunngavigiinnarlugu imaluunniit suliami allagaatinik misissuereernermi kingorna suliaassaq itigartitsissutiginiarlugu aalajangerpat imaluunniit nalilerpagu oqartussamut naammagittaalliuutigineqartumut isornartorsiulluni oqaaseqarnissamut inassuteqaateqarnissamulluunniit tunngavissaqanngitsoq.

Imm. 2 pillugu

Suliami nalileereernerup kingorna paasitinneqarsinnaatitaanerup suliamilu illua'tungiusut paasitinneqarsinnaatitaaneq pillugu inatsit aamma suliaassat suliarineqartarnerat pillugu inatsit naapertorlugit suliami allagaatinik paasitinneqarsinnaatitaanerisa allagaatinut aalajangersimasunut, Ombudsmandip suliamik paasinnikkallarneranik imalinnut, tunngasumik atuuttussaanginneranik aalajangernissamut Ombudsmandi aalajangersakkap taassuma periarfissippaa.

Aalajangersagaq assersuutigalugu nassuiaatigigallakkamik tamanut nalunaarutiginninnerup ingerlatsinermut oqartussaasumut pineqartumut imaluunniit inuit ataasiakkaat inatsisit naapertorlugit innarlitsaalineqarnissaannut naleqqutinngitsuusorisariaqarneranik pisoqarfiusuni atorneqarsinnaavoq, pingaartumik Ombudsmandip nalilerpagu,

nassuiaataagallartup oqartussaasumillu tusarniaaviginnereernerup kingorna inaarutaasumik nassuiaatip akornanni allannguuteqartoqarsinnaasoq.

Ombudsmandi suliami allagaatinik paasitinneqarsinnaatitaanermik atorunnaarsitsinissaq sioqqullugu oqartussaasumit pineqartumit immikkut ittumik oqaaseqaammik apeqqut pillugu oqaaseqaateqartitsiniarsinnaavoq.

Ombudsmandip suliamik suliarinninnerani allagaatit pigineqarallartut allagaatinik paasissutissiinermi ilaatinneqartariaqarnersut aalajangiinnermi pingaartillugu isiginiartariaqarpoq manna illua'tungeriinnut tamanut illersorneqarsinnaanerpaajussasoq, tassalu inuiaqatigiit nalunaarusianik, oqaaseqaatinik, nassuiaatinik il.il. taakkulu inernilerneqarnerinik paasissutissat tamarmiusut eqqortullu tunngavigalugit oqaluuserinninnissaminut periarfissaqarnissaat.

§ 22 pillugu

Aalajangersagaq taanna malillugu Inatsisartut Ombudsmandiat Folketingip Ombudsmandiata inassuteqaateqarnissaminut periarfissaqartitaanerata assinganik periarfissaqarluni naammagittaalliortup allalluunniit imminut aningaasartuutaanngitsumik eqqartuussivikkoortitsinissaminut akuerineqarnissaanik inassuteqaateqarnissaminut periarfissaqarpoq, pineqartup tamatumunnga aningaasaqarnikkut eqqortitsinersoq apeqqutaatinnagu.

Aalajangersagaq pingaartumik pingaaruteqalersinnaavoq pissutsit pisimasut imaluunniit inatsisinut tunngasut uppernarsaanikkut, Ombudsmandip misissuineranut killissarititaasut iluanni naammassineqarsinnaananilu naammassineqartariaqanngitsukkut, taamaallaat paasinarsisinneqarsinnaappata.

Assersuutigalugu uparuarneqarsinnaapput suliat oqartussaasup taarsiiviginninnissamut akisussaanerata aalajangersarnissaa naammagittaalliortumut pingaaruteqartut ingerlatsinermullu inatsiseqartitsineq naapertorlugu kukkussuteqarnernik paasisaqarneq minnerusuinnarmik pingaaruteqartut. Taarsiivigineqarnissamik piunasaqarneq Ombudsmandip isummerfigisinnaanngilaa, taamaattumillu pisortanut oqartussaasunut piunasaqaatit taamaattut amerlanertigut eqqartuussivinnit aalajangerneqartariaqartassallutik.

Aalajangersakkap suliani inatsisit naapertorlugit apeqqutinik nalorninaateqarluinnartunik, assersuutigalugu inatsisinut piareersaataasut isummersornerisigut paasinarsisinneqarsinnaasimannngitsunik ilalinni, imaluunniit aamma suliani ingerlatsiviup suliamik suliaqarnermi kukkuluttorsimasinnaanerata pisussaaffiusumik aalajangiivigineqarnissaa innuttaasup inatsisitigut soqutigisaqarfigisaani, atorneqarnissaa aamma eqqarsaatigineqarsinnaavoq.

§ 23 pillugu

Aalajangersakkakut tassuuna erseqqissarneqarpoq pisortat ingerlatsivianni annertunerusumik sunniuteqartumik kukkussuteqartoqarsimasoq sumiginnaasoqarsimasorluunniit ilimagisariaqartoq Ombudsmandip suliamik misissuinerata takutippagu tamanna Inatsisartut Inatsisinut Ataatsimiititaliaannut nalunaarutigissallugu Ombudsmandi pisussaaffeqartoq.

Malittarisassamik taassuminnga atuinermi ilimagisariaqarpoq Ombudsmandi naliliinerminut tunngavigisamini aallaaveqassasoq, tassalu inatsisit naapertorlugit innarlitsaalineqarnerup inatsisillu naapertorlugit illersorneqarnissap tungaatigut mianerisassat, taamaaliornikkut ingerlatsinermi amigaatit pingaaruteqartut imaluunniit innuttaasunut tunngasumik inatsisunik unioqutitsinerit annertuut nalunaarutigineqartarumaarlutik.

Kommunit ingerlatsinerini kukkunernik sumiginnaanernillu annertuunik Ombudsmandip nalunaarutiginnittarnera taamatuttaaq Inatsisartut Inatsisinut Ataatsimiititaliaannut, suliap Naalackersuisunut imaluunniit Naalackersuisut Siulittaasuannut, kommuninik nakkutilliinermi oqartussaaffimmuut qullerpaamut siulittaasuusumut, politikikkut suliassiissutiginninnissaminut periarfissaqartumut, taamatuttaaq pisarumaarpoq.

Ombudsmandip misissuineri oqartussaasunut aallaavittut sammitinneqartarput, inunnut ataasiakkaanut sammitinneqarnatik.

Taamaattorli Ombudsmandi, tamanna qaqutiguinnaq pisumik pisariaqarsorineqassagalarpat, inuit, tamatumani aamma Naalackersuisunut ilaasortat, atorfimminnik ingerlatsinerat pillugu eqqartuussisunut suliassanngortinnissaat pillugu inassuteqaateqarsinnaatitaaginnassaaq, matumanittaaq tak. inatsisissatut siunnersuummi § 7 aamma § 20 pillugit oqaaseqaatit.

Naalackersuisunut ilaasortat akisussaassuseqarnerat pillugu Inatsisartut inatsisaat naapertorlugu Naalackersuisunut ilaasortap eqqartuussisunut suliassanngortinneqarnissaanik inassuteqaateqarneq § 23 naapertorlugu Inatsisartunut Naalackersuisunullu nalunaarutigineqartassasoq naatsorsuutigineqarpoq.

§ 24 pillugu

Aalajangersagaq taanna Ombudsmandip oqaaseqaataa atorfik naapertorlugu saqqummiunneqarsimasoq pissutigalugu inuit ataasiakkaat eqqartuussivinnut suliassiissuteqarnerinut, assersuutigalugu Ombudsmandip oqaaseqaataa atorussaatinnginnissaanik imaluunniit Ombudsmandip misissuinermik aallartitsisussaatinnissaanik siunertaqartunut taamaallaat atuuppoq.

Ombudsmandimik inuinnartut eqqartuussisunut suliassanngortitsinerit tamatuma avataaniipput.

Aalajangersagaq sulianik Ombudsmandip sularisimasaanik eqqartuussiviit tamatuma kingornagut misissuinerinut tunngangilaq.

Oqaatsimik “-sinnaavoq”-mik atuinikkut aalajangersakkamit erserpoq eqqartuussiviit Ombudsmandip itigartitseqqusissutaata malinnissaanut pisussaaffeqanngitsut.

Justitsministereqarfiup allakkani 8. marts 2001-imeersuni Inatsisartut nalunaarfigai aalajangersagaq taanna ministerip oqaaseqaatissaqarfiginngikkaa.

Kapitali 4 - Aaqqissuussaanermut tunngasut

§ 25 pillugu

Imm. 1 pillugu

Ombudsmandip akissarsiamigut inissisimaneera aalajangersakkap taassuma oqaatigaa.

Ombudsmandi suli inummut tapilerneqarsinnaasussaassaaq. Inummut tapiliisoqassappat inummut tapit Ombudsmandi isumaqatiginiareerlugu Inatsisartut Siulittaasoqarfiannit aalajangersarneqassapput.

Atorfininnermut soraarnermullu atatillugu akiliunneqarluni angalasinnaatitaaneq pillugu aalajangersagaq Ombudsmanditut atorfiup immikkut ittuuneranik tunngaveqarpoq, Ombudsmandillu sulilernermini soraarnerminilu Naalakkersuisunut ilaasortanit ajornerusumik inissinneqannginnissaa qulakkeerlugu.

Ombudsmanditut soraartup suliffimmut allamut naleqqussarnissaa imaaliiallaanaq ajornakusoorsinnaavoq, tassami Ombudsmandip oqartussaasumut Ombudsmanditut sulinermi nalaani nakkutigisimasaminut nuunnissaa piviusorsiorpallaanngitsutut isigineqartariaqarmat, taamatuttaarlu Ombudsmandi inatsisissatut siunnersuummi § 5, imm. 2-ip nassatarisaanik Ombudsmanditut sulinermi nalaani namminersorluni inuussutissarsiornermut attuumassuteqarnissaminut mattusimaneqarluni.

Ombudsmandip nuunnermi ajunngitsorsiassaqaqtitaanermigut aamma soraarnermut atatillugu akiliunneqarluni angalasinnaatitaanermigut suliamut nutaamut nuunnermi ajornartorsiutinut allaaserineqartunut taamatut taartisiaqartinneqarnissaa naleqquttuosorinarpoq.

Tamatuma pissuseqataanik malittarisassatut siunnersuutigineqartoq taanna sulisussarsiniarneq aamma Ombudsmandimut inuttut piumasaqaatit annertuut piumasaqaatigineqartut

isiginiarlugit aamma naleqquttuussaaq.

Ombudsmandip soraarnerussutisiaqarsinnaatitaanera aamma
Ombudsmandiujunnaarnerisuteqarsinnaatitaanera pillugit aalajangersakkap
oqaasertalersorneqarnerani siunnersuutigineqarpoq Ombudsmandip pisinnaatitaaffia
Naalackersuisunut ilaasortat pisinnaatitaaffiannut immikkut ataneqartinneqassasoq,
taamaalilluni Ombudsmandip soraarnerussutisiaqartitaanikkut inissisimanera
nalornissutigineqartaqqunagu, Naalackersuisunut ilaasortat pillugit malittarisassat immikkut
ittut qaquguugaluarnersoq aalajangersarneqassappata.

Soraarnerussutisiaqartitsineq taamaattoq soraarnerussutisiaqarnissamut sillimmasiisarfik
namminersortoq aqcutigalugu sillimmasiivigineqassappat tamatumani tunngaviuvoq
Ombudsmandi soraarnerussutisiaqarnissamut sillimmasiisarfimmik atorneqartussamik
toqqaanermi Inatsisartut Siulittaasuannut inassuteqaateqassasoq.

Imm. 2 pillugu

Aalajangersakkap manna siunertaraa, tassalu Ombudsmandip soraarnerussutisiaqarnermik
aaqqissuussineq Naalackersuisunut ilaasortanut Naalackersuisunut
ilaasortaajunnaarnerisuteqartitsineq soraarnerussutisiaqartitsinerlu pillugit malittarisassanik
malinninngitsoq toqqarsinnaagaa, tassami Ombudsmandip Ombudsmanditut atorfimmi
soraarnerussutisiaqarsinnaatitaanermi soraarnerussutisiaqartitsinermik aaqqissuussinermut,
assersuutigalugu soraarnerussutisiaqartitsinermi aningaasaateqarfimmut Ombudsmandip
Ombudsmanditut ivertinneqannginnermini imaluunniit Ombudsmanditut soraarnermi
kingornatigut attaveqarfignaminut nuunnissaata periarfissaqarnissaa naleqquttuusorinarmat.

Aalajangersagaq taanna pisuni Ombudsmandip akissarsiaasa Naalackersuisunut ilaasortat
akissarsiaannit qaffasinnerusut aalangersarneqarfianni Ombudsmandillu qinigaaffinni arlallini
qinigaqqiffigisaani aamma naammaginartuusussaavoq, tassami pisumi tassani imm. 1
tunngavigalugu soraarninngornerup nassatarisinnaasussammagu Ombudsmandip akissarsiat
Ombudsmandip akissarsiarisimasaanit appasinnerusut aallaavigalugit
soraarnerussutisiaqartinneqarnera.

Ombudsmandip malittarisassat sorliit tunngavigalugit soraarninngortinneqarnissani
tulliullugulu soraarnerussutisiassat naatsorsorneqarnissaat kissaatiginerlugu
kingusinnerpaamik piffissami soraarfigisamini toqqarsimassavaa.

Imm. 3 pillugu

Aalajangersakkakut tassuuna oqaatigineqarpoq Ombudsmandip soraarnerani
toqukkulluunniit qimagunnerani akissarsiat qanoq tunniunneqassasut.

§ 26 pillugu

Aalajangersakkap erseqqissarpaa Ombudsmandip allaffissornikkut aqutsinera Ombudsmandimullu aningaasaliissutigineqartut Inatsisartut iluminni ingerlatsinerisa iluanni suliassaasut, taamaalillutillu Naalakkersuisut suliassarinagit.

Imm. 1 pillugu

Ombudsmandi sulisumi atorfinitsinnissaannut nammineerluni suli oqartussaasuvoq.

Imm. 2 aamma 3 pillugit

Aalajangersakkat taakku periaaseq inatsisikkut aalajangersarpaat.

Imm. 4 pillugu

Ombudsmandip naatsorsuuserinera Inatsisartut Siulittaasoqarfiannit piginnaatitsissut naapertorlugu siusinnerusukkut pisarsimavoq, Ombudsmandilli naatsorsuuserinermi aningaasaqarnermillu ingerlatsinerminut akisussaaffik nammineq massakkut tigummivaa.

Imm. 5 pillugu

Aalajangersakkap taassuma manna siunertaraa, tassalu oqartussaasut Ombudsmandip nakkutigisai Ombudsmandimut peqqusissuteqarnissaminnut inatsiseqartitsinikkut pisinnaatitaanngitsut. Tamanna Ombudsmandip arlaannaannulluunniit attuumassuteqanngitsut inissisimanerata piviusumik imaqarnissaanut annertuumik tunngaviuvoq.

Kalaallili Nunaanni Ombudsmandip Atorfeqarfiani atugassiissutaasut killeqarnerat pissutigalugu pisuni arlalinni aqqissuussaannikkut suliassat aqutsinermi allaffissornikkut oqartussaasunut isumagisassanngortinneqartarnissaat Ombudsmandip pisariaqartittarsimavaa.

Pineqartoq tassaavoq akissarsianik Ombudsmandip aqutsinera, taannalu Inatsisartut Allattoqarfiata aqutsisoqarfiullu isumaqatigiissutaat tunngavigalugu Aningaasaqarnermut Naalakkersuisoqarfiup Aningaasaqarnermik Sulisoqarnermillu Aqutsisoqarfiani akissarsialeriffimmit ullumikkut isumagineqarpoq.

Aammattaq pineqartoq tassaavoq sulisunut inissianik Ombudsmandip sulisuminut atugassiissutigisartagaanik innersuussisarneq aqutsinerlu.

Inatsisartut Allattoqarfiata aamma Ineqarnermut Naalakkersuisoqarfiup Inatsisartuni aamma Ombudsmandeqarfimmi sulisunut inissianik innersuussisarneq pillugu isumaqatigiissut inissianik attartortitsisarneq pillugu Inatsisartut peqqussutaat tunngavigalugu isumaqatigiissutigimavaat.

Ombudsmandip naatsorsuuserisoqarfia piffissat ilaanni, pingaartumik atorfiit ilaasa inuttaqannginnerisa nalaanni, Ombudsmandimut aalajangersimasumik isumaqatigiissutit

tunngavigalugit Qitiusumik Naatsorsuuserisoqarfimmit aammattaaq isumagineqartarsimavoq.

Suliassanik oqartussaasunut Ombudmandip nakkutigisaanut taamatut isumagisassangortitsisarneq pisuni arlalinni aqutsinermi oqartussaasut taakku Ombudsmadimut taassumalu sulisuinut ilumut peqqusissuteqarsinnaanerannik nalornissutiginnilersitsisarsimavoq.

Taamaattumik siunnersuutigineqarpoq suliassat Ombudsmadip Atorfeqarfiata aaqjissuussaananut tunngasut oqartussaasunut il.il. Ombudsmadip nakkutigisaanut isumagisassangortinneqartarnissaat Ombudsmadip suli pisariaqartutut isigippagu tamatumunnga inatsisitigut tunngavigisaq tassaassasoq inuit ataasiakkaat pillugit inatsiseqartitsineq tunngavigalugu isumaqatigiissut, tasanilu Ombudsmadip aamma oqartussaasup pineqartup pisinnaatitaaffii pisussaaffiilu aalajangersarneqassasut.

Aalajangersakkap taassuma imaaliiallaannaq kingunerisassaa tassaavoq suliassaqarfinni isumaqatigiissutigut aalajangersaavigineqareersimannigitsuni isumaqatigiissuteqartoqarnissaa.

§ 27 pillugu

Suliassamik isumaginnittussangortitsisinnaatitaaneq pisunut, assersuutigalugu Ombudsmadip napparsimaneq, sulinngiffeqarneq, aallarsimaneq pissutigalugu allamilluunniit pissuteqarluni suliarnik isumaginninnissinnaajunnaarallarnernut tunngavoq. Atorfeqarfimmi sulisut amerlassusiisa killeqarnerat pissutigalugu aamma Ombudsmadip nammineerluni suliffiup iluani allaffissornermik isumaginninnissaanik tunngaveqarneq, aammattaaq tak. § 26, pissutigalugu siunnersuutigineqarpoq suliassamik isumaginnittussangortitsinerup annertussusissaanik tamatumanilu atugassarititaasunik sukumiinerusunik aalajangersaanissaq Ombudsmadimut namminermt tunniunneqassasoq.

Suliassamik isumaginnittussangortitsisinnaatitaaneq suliassat piareersarneqarnerannut taamatullu oqaaseqaammik inaarlugu sularisamik tunniussinermut kiisalu § 26 naapertorlugu pisinnaatitaanernik sularinninnermut atuuppoq.

§ 28 pillugu

Imm. 1 pillugu

Ombudsmadi taamatullu Ombudsmadip sulisui pinerluttulerineq pillugu inatsisip nipangiussisussaataaneq pillugu aalajangersagartaanik malinnittussaatinneqarput, matumani takuuk pinerluttulerineq pillugu inatsimmi § 50.

Ombudsmadi tamatuma pissuseqataanik paasissutissanik allanut isertuussassanik tamanut

ingerlatitseqqissinnaangilaq. Taamaattumik suliat Ombudsmandip ukiumoortumik nalunaarutaani saqqummiunneqartut issuagaaneranni kinaassutsit ilisarnarunnaarsinneqartarput.

Imm. 2 pillugu

Matuma qulakkeerneqarnissaa aalajangersakkap siunertaraa, tassalu Ombudsmandip suliasat suliarineqartarnerat pillugu inatsimmi pineqartunut ilaatinneqanngitsup allaffissornikkut aqutsinermi oqartussat suliasat suliarineqartarnerat pillugu inatsimmi § 27, imm. 3-mi nipangiussisimaqqusisinnaanerisa pissuseqataanik oqartussaasunut, suliffeqarfinnut inunnullu Ombudsmandimut isumaqatigiissuteqarnikkut Ombudsmandeqarfimmi suliasanik kiffartuussillutik sulisunut nipangiussisimaqqusinissamut periarfissaqarnissaa. Aalajangersakkap taassuma assersuutigalugu suliffeqarfinnut eqqiaanermik ingerlataqartunut, qarasaasialerinemik suliaqartunut ingerlatsinermilu oqartussaasunut Ombudsmandip isumaqatigiissuteqarfigisaanut atorineqartarnissaa eqqarsaatigineqarsinnaavoq, tak. inatsisissatut siunnersuummi § 26, imm. 5.

Imm. 2-p paasissutissanut pisortat ingerlatsineranni suliasat suliarineqartarnerat pillugu inatsimmi § 27, imm. 1-imi pineqartut assinginut atorineqartarnissaa tunngaviuvoq.

§ 29 pillugu

Taaguutip Ombudsmandip atorfinni, atorfeqarfinni il.il., inatsisikkut Inatsisartunit akuersissutigineqarsimasunuinnaq atorineqarnissaata qulakkeerneqarnissaa aalajangersakkap qulakkeerpaa.

Aalajangersakkap, Danmarkimi Ombudsmandi pillugu inatsimmi § 30-mut naapertuuttup nassataraa atorfeqarfiit, suliffiit, peqatigiiffiit il.il. Kalaallit Nunaanniittut, inuit ataasiakkaat pillugit inatsiseqartitsineq tunngavigalugu pilersinneqarsimasut taamatullu Kalaallit Nunaanni kommunit inatsisikkut tunngavissaqaratik nakkutilliivittut oqartussaaffimmik taamatut taaguutilimmik pilersitsisinnaatitaanngitsut.

Taaguut naalagaaffimmi oqartussaasut taaguummik "Rigsombudsmand"-imik atuinerannut killilersuinemik nassataqanngilaq.

§ 30 pillugu

Imm. 1 pillugu

Inatsit 1. juli 2017-imi atortuulissasoq siunnersuutigineqarpoq.

Imm. 2 pillugu

Inatsisartut Ombudsmandiat pillugu Inatsisartut inatsisaat nr. 8, 3. december 2009-meersoq

tamatumunnga peqatigitillugu atorunnaarsinneqarpoq.

Imm. 3 pillugu

Imm. 3-mi ikaarsaariarneq pillugu aalajangersakkami siunnersuutigineqarpoq naammagittaalliutit inatsisip matuma atortuulersinneqannginnerani Ombudsmandimut tunniunneqartut Ombudsmandi pillugu inatsimmi massakkut atuuttumi aalajangersakkat tunngavigalugit suliarineqartassasut.